

ASO FARAILE, 24 IUNI 2022

Na nofoia e le Fofoga Fetalai le Nofoa i le itula e 9:30 i le taeao.

Tatalo.

FOFOGA FETALAI: Ou te faasilasila atu ua toe amatalia nei Taulumaga a le Fono Aoao Faitulafono.

Ia, e faatalofa atu i le maualuga o le tatou Maota i lenei taeao, malo le soifua manuia ma le lagi e mama. Ua tatou i ai i le toe aso o galuega o lenei vaiaso, faafetai i le Atua o lo o maualuga pea le soifua manuia i le paia o le Palemene. I le afio o lau Afioga i le Sui Palemia, afifio le paia o le Kapeneta, faapea foi a outou Afioga i Minisita Lagolago.

I lea foi Itu i le afio o lau Afioga i le Sui Taitai o le Itu Agai ma sui usufono uma o le Palemene. Malo le usufono i lenei vaiaso, malo le onosai.

E faatalofa atu foi i Ofisa Sili o Pulega o Matagaluega ma Faalapotopotoga Tumaoti a le tatou Malo, taeao manuia, malo le usu. I le maimoa faafofoga mai a le atunuu, e faatalofa atu lau Palemene i lenei taeao.

I le faagasologa o le tatou galuega, ia o le aso Faraile lenei, e manava foi le tatou galuega i le itula e 12:00 i le aoauli. E matau atu ua le o toe tele ni saunoaga. E i ai foi le talitonuga o le Nofoa, e tatau ona maea uma saunoaga i le aso Fono lenei ona tali ai loa lea o le tatou Malo i le aso Gafua pe a momoli atu i ai le soifua ma le ola o le tatou Palemene i le alofa ma le agalelei o le Atua. Ia manuia le usugafono i lenei taeao, manuia le tapuai mai o si o tatou atunuu.

TULAFONO TAU FAAOFI O LE FAATATAUINA O TUPE FAAOPOOPO (NU.2) 2021/2022 & TULAFONO TAU FAAOFI O LE FAATATAUINA O TUPE 2022/2023 – felafolafoaiga faaauau i luga o le faitauga faalua – Aso Fono lona 4

FOFOGA FETALAI: E tolopo galuega a le Fono Aoao Faitulafono i le po anapo ua maea ona saunoa le sui usufono mo Faasaleleaga 2.

Ia o le avanoa lenei i se isi sui usufono mamalu e fia saunoa. Ia, faafetai o lea ua matau atu o lea ua afio mai le sui usufono mo Sagaga 2, ia o lou avanoa lenei.

Susuga MAULOLO TAVITA AMOSA (Sagaga 2): Ou te tulai atu i le ava tele ma le migao i luma o le Fonousu mamalu a le Palemene o le tatou Malo Tutoatasi. A o le i muai faia sau folasaga, ia ou te aoao malu i puega le ofe a le tautai ona o le toesea foi i nai aso foi o lenei vaiaso, ia e le alofia lava pe a uagagau ma oo mai foi vaivaiga o le tino. Ae faafetai i le alofa o le Atua ua amata ona toe faafoi mai le malosi aua foi a tatou fatuaiga tausii e pei ona valaauina ai tatou.

E faatalofa atu i lau afioga i le Fofoga Fetalai, le paia o le Malo, i lau Afioga i le Sui Palemia ma le mamalu o la outou Kapeneta ma lena Itu o le vai i Minisita Lagolago.

E faapena foi ona faatalofa atu i lenei Itu o le Malu, i le Susuga i le Sui Taitai foi o le Vaega Faaupufai i lenei Itu ma le nofo a sui usufono, aemaise foi o le toesea foi o lo o aitaumalele mai le sailigamalo foi a le Afioga i le Tamaitai Palemia, a o se tapuaiga foi a le Taitai o lenei Itu o lo o faafofoga tapuai mai i le tatou Fonousu i lenei vaiaso.

E avatu foi se upu faatalofa i le mamalu o Matagaluega e fia a le Malo i la outou tautua matavela faifaipea i lea aso ma lea aso, e pei foi ona matauina i lenei taeao, i Ofisa Sili o Pulega o Matagaluega ma le mamalu o la outou Matagaluega, faafetai, aemaise foi le aufaigaluega o le Maota Fono nei i le ao ma le po, e leai lava se mea o faaletonu i la outou tautua. Ia alofa le Atua faamanuia pea la outou galuega faifaipea. O upu a le atunuu, e le sili foi le tai i lo le tapuai.

Ua faafofoga tapuai le paia o Samoa aemaise o le au Sa Levi o Tootouli o le Talalelei i so o se fatafaitaulaga, faamalo, faamalo le tatalo. O tino vaaia ia o la outou tatalo, o lo o liutino tagata i totonu o le Maota lenei i Tiafau. O a lava tulaga e tau lamatia ai le filemu, peitai, e tetele a Pesega ae matua lava i le oo e pei o lea upu i laufanua nei. Faamalo foi le tapuai i le paia ma le mamalu i alii ma faipule i so o se afioaga ma so o se itumalo o Samoa. O outou sa ma faiga, o le a le oo i ai se faamatalaga a Tuisamau i le taeao lenei. Amuli ona ou faatalofa atu i le tapuaiga a si o matou itumalo o Sagaga 2 po o Sagaga le Usoga. Faafetai i le afioga o Malie, Afega ma Tuanai, malo le tapuai mai, malo foi mo e sa asiasi mai foi a o uagagau la outou auauna.

O lenei taeao, ia o lea ua maua atu o le toe aso lenei aua foi ni manatu faaalua e uiga i le tatou Tala o le Tupe. Sa faalogologo mai foi i aiga ma tapuaia foi le Fonousu. Faamalo faafetai ua afea le tele o mea, o manatu foi sa fia faaalua. Ae ua ou vave usupo i le taeao nei leaga sa ou fia maua le vailiu e folau ai paopao matou te ofi faatasi ai i le ava. Peitai, e lelei lou vavevave ne i omia i manua o ia o le a folau mulimuli. Ia o le ala lea o le vave taumafai atu. E tolu lava nai mea ia ou te fia soso mai ai.

Muamua, e avatu lava le faamalo ma le faafetai i le Malo aemaise le Afioga i le Tamaitai Minisita o Tupe faapea le aufaigaluega, le Ofisa Sili o Pulega ma le aufaigaluega a le Matagaluega o Tupe. Faamalo mo la outou galuega. O le upu moni lava e faiva ese Lopepe i le faafofoga mai foi a Samoa, leaga

o le tino lea o la outou faasalalauga ma folafolaga sa fai ia Samoa, lea ua liutino mai la outou Tala o le Tupe, faamalo fai o le faiva. O tulaga masani lava ia o upufai o Malo, o ai lava ua tulai mai, faatino la outou galuega. Ia talofa i lou uso mai Sagaga 1, lelei, afio maia.

Ae o le taua ia te au o le saunoaga foi a le matou Taitai sa masani ona faalele i le ea, e le o matou o se Itu Tetee, o matou o le Itu Agai, matou te agaia ma tuualalo atu i le Malo. O lena ua i ina le malosi, matou te fesoasoani atu e avatu so matou tauau i mea e manuia ai le tatou galuega. O lea foi ua toe faamanatu mai i le tatalo a le Fofoga Fetalai i le taeao nei le malelega a le Malietoa, ia tia i nisi mea tatou te eseese ai, ae tutu faatasi ma tatou galulue faatasi.

O le Tala o le Tupe lena i le matau atu, e faiva ese Lopepe i le tulaga ua lilifa lava le faasoa i afioaga. Faafetai. Aemaise pei o lea foi na taua i le folasaga i le taeao nei le 81 i le 83% o tatou eleele faaleaganuu lea e i lalo o le pule faamalumu a alii ma faipule. O lea la ua matau atu ua agai i ai le faasoa a le Malo ua tulai mai nei, faafetai. Na pau lava lea o sa matou upu, tatou faoliu le vaa e tasi pei ona saunoa nisi o sui usufono nei. Na pau lava lea o se tuualalo, aveaveai lau faasoa limalelei. Afai ua outou manatu e faasoa i tua i le afioaga, aua ne i galo Afia i si ona vao, aua ne i galo le afaigaluega public servants ona o le tulaga lena.

Muamua, o se tasi o atugaluga ua faaalua e le Malo, o le tulaga lea i le RSE, pei ua tau i ai se popolega i le toatele ua o i fafo. Ae ou te manatu, tasi lea auala e fesoasoani e foia ai, sii i luga totogi o tagata faigaluega a le Malo. Ia ou te iloa e le tele lava se mea o lea e avatu ai se tuualalo, a maua lava sina 10% oka, talafeauga lena ma le siitaga ua i ai le tau o le soifuaga. Ioe. E le o se upu lava e aveane ai. Ave la outou fesoasoani i tua i afioaga, faamalo faafetai. Ae a ogatasi le futia ma le umele ia i latou o lea e tapuvaetasi i i ma tua i ai tatou i le tatou faamoemoe lena, e fai la o se tulaga e fesoasoani e tau taofiofi ai le o i fafo i RSE ma galuega faapena, a o le fesoasoani i le siitia o le tau o le soifuaga.

O lona lua lau Afioga i le Fofoga Fetalai, e fia avatu lava se tuualalo a le itumalo lena, pe mafai lava ona toe silasila ane le Malo faamolemole, le Palemia ma le Kapeneta pe mafai ona tau fetuunai lafoga mo taumafa aua le tausia o le soifua laulelei o tatou aiga i aso taitasi. E le afea lava sou leo ma se fautuaga i lafoga o mea taatele pei o le faugafale ma mea faapena, e taoto lava e manaomia foi e le Malo se tupe. Ae i le matau atu i le Tala o le Tupe lea pei ua ave foi e le Matagaluega le faamamafa i ai, ona o tulaga ua i ai faamai ma mea faapea. O i la i le vaiiliu lea e mafai ona fesoasoani ai le Malo i tulaga ia o le taumafaiga o le soifua maloloina. Ua tatou masani, tatou te galulue. A tatou foi atu i tatou aiga, mum, o a mai le fanau? O a mai le pepe? O le a se lagona ae faapea mai le tina, E! ua le lava le faasoa ua le maua se napkin, tulou, ua le maua se susu lele e fafaga ai le pepe. O lena.

O le upu moni lau Afioga i le Fofoga Fetalai, po o le a le manaia ma le matagofie ma le tele o lenei faasoa ua avatu i tua, ae uma ane lava le aso, e foi mai lava ia te oe le tama ma le tina, o faapefea le tausiga o le fanau? E manaomia tele i le aiga lima vaivai se failele, le tausiga o lana pepe, ia maua mea mama e faaitiitia ai foi le tele o faamai. O le mea lena o lea ou te augani atu ai, o le tau o le susu e fafaga ai pepe, sina araisa, falaoamata ma mea faapena, basic food items, ina ia gafatia e tagata uma o Samoa. A mafai lava ona silasila ane i se tulaga e le o faigofie a tatou tupe maua. Ae avatu pea i lumamea i la outou pule faasoasoa, aua a ola lelei mai a tatou fanau iti, o le lumanai lena o Samoa, o latou lena e faamoemoe i ai latou te faaoga le maau o le Malo lea ua faasafua atu i tua. Ae afai e amata mai i le ola mamai se i tulou, o le upu e to ia te au a tatou fanau iti, ia, tasi lea faatupu avega i le Matagaluega o le Soifua Maloloina. Ia, na ona faataatia atu i autafa i ina tulaga, aua o lea e 15%, a mafai ona tau faapau mai i le 5%, se ata faataitai, ona ua fai lava si maualuga o tau o oloa ma i fafo. Ioe. Ae na ona faataatia atu pea pe tau ane i ai la outou faasoa.

Lau Afioga i le Fofoga Fetalai, ia ona o lea sa ou faalogo ma le totoa i lau folasaga i le aso muamua, e i ai se ituaso o muamua tatou te talanoa ai ma soalaupule meataitiasi, ae pei o le tulaga lava lea i lona aoatetele. Ae ou faalogo mai lava i le aso ananafi ua tau siisii le siufofoga o le Afioga i le Minisita o le Soifua Maloloina, pe i ai se fesoasoani i le tau o le suauu aua e leai ni tatou fale suauu. E moni. Tasi lea mea e avatu ai se tuualalo, pe silasila ane pe i ai nisi tulaga alatupe tatou te mafai ai pe mafai ona subsidize le tau o le penisini mo lenei lava vaitau se i tau feoloolo foi le tamaoiga o Samoa. Ioe. Aua o le mea moni lava ua faaleo atu nisi o atugaluga i le tulaga o i ai le deficit ma mea faapena. Ou te manatu, se na o mea o Taitai o le Malo e tetele fatu, tulou, e tulai mai ma le lototele i taimi faapenei. Pau lava si fautuaga e taatia atu i tafatafa, se i silaila totoa po o lava pea le malosia o tatou e mafai ai ona fai ma toe togitogi a tatou aitalafu. E pei o le popolega lava lena. Ou te talitonu o lena e tele economist e mafai ona fautuaina lena itu foi o le tatou Malo i tulaga faapea. Aua ata vaai atu nei foi i faasalalauga o nisi e popole, o lea ua i ai le tamaoiga o Samoa i le tulaga fai mai o le economic shock. Ia, pei ua ou tau vaavaai i ai, e pei a faa-Samoa lea mea o le economic shock, o se tamaoiga ua faamanupoia-i-ofaga, po o se gagana tuusasao, o se tamaoiga ua te i. Ia o ai se a le te i lona tamaoiga i mea o lo o tutupu nei i le lalolagi? E le o toe pouliuli Samoa i lenei itulagi, ioe. Ia, ae o ituaso faapenei, e le sese ai upu e masani ai, lea ou te faalogo soo lava o saunoa i ai le Sui Palemia, o aso faapenei e iloa ai le tautai matapalapala. Ioe. Po o le a lava le nenefu o le sami, ae maua atu lava ma lana matatao sau ma le i'a. E tutusa lava le silasila i aso e palapala ai le tai ma le aso e manino ai le tai. Ioe. Na pau lava o lea na o le matou faamalo ma soso atu e fesoaoani atu.

O le mea mulimuli lenei i tulaga pe mafai ona tatou control tulaga o tau o suauu. Lau Afioga i le Fofoga Fetalai, o upu masani a le atunuu, o le tagata

ma lona faasinomaga. Ua tatou oo mai nei i totonu o le Palemene lenei, ua tofu silafia uma faasinomaga o sui usufono taitasi, aemaise lana agaifanua. Pau la le tulaga lea ua vaavaai i ai, o lo outou afifio mai ma tatou omai faatasi tatou te nutimea i totonu o le Maota lenei aua manu o Samoa, e i ai la le fesili ua tulai mai. A faapea o le tagata ma lona faasinomaga, e a fa se tofa saili ma se lagona i lena Itu ma lenei Itu i se upu foi lea, ae faapefea le tulaga o le atunuu ma lona faasinomaga? E i ai se tatou national identity? Na ou tau suesue foi lea i nisi o le aufai mafaufauga, ae malie lava la lou tau ane i le tagata lea e igoa ia Frank Zappa, o le tagata lauiloa foi i faafiafiaga i tulaga tau musika i Amerika, ma e faapea o le tele ia o sona sao i le uunaiga o tulaga o alatupe maua i mea nei o faafiafiaga faiga faa-turisi. O la e la fai mai a ia, “you cannot be a real country unless you have your own beer and your own national airline.” Ua ou le aumaia ni mafaufauga o le aufai polokiki, ae pei ua ou aumaia le mafaufauga o le tagata lea, atonu o se lagona foi lena e vaai ai tagata lautele o Samoa i le tulaga o se tatou national beer. A lea ua i ai le tatou ava, vailima, taula. A o se tulaga i se tatou national airline. Le tagata lea o Frank Zappa, Z a p p a. Ioe. Faapea, oi sole, o le a le uiga? O le manaia o la outou faasoa, ae a i ai la ma se tatou airline, o le a se lagona ae e oso i lalo i le malae vaalele i Aukilani po o Ausetalia po o Hawaii ae e savalivali ma lau ato ae toe tepa mai tua, ae sole, there is it o le matou national airline lea. O le a sou lagona i ai? E manaia. Ia ua uma foi lea tulaga i ai, ioe.

Tofa Hon Olo Fiti Afoa Vaai (Minisita o Galuega, Felauaiga ma Atinae Eseese): Lau Afioga i le Fofoga Fetalai...

Susuga MAULOLO TAVITA AMOSA: Ona o lena o le a faapea mai foi lau uo le sui usufono mamalu, ae o nai motugaafa...

FOFOGA FETALAI: Malie ia le sui usufono mamalu, se i tuu atu le avanoa i le Minisita ona faauma mai lea o lau lauga. Lau Afioga i le Minisita...

Tofa Hon Olo Fiti Afoa Vaai: Na o si vaega lava lea e tau faamalamalama atu i le Afioga i le sui usufono mamalu, o lea e i ai le tatou national airline, a lea e felelei lava tatou vaa i Tutuila? O la e la e i ai lava, e le o i ai se mea faapea ua leai ua matua leai lava. Na o se mea lena e faamanatu atu i le Afioga i le sui usufono mamalu, o la e iai le tatou national airline.

FOFOGA FETALAI: Faafetai. Ou te iloa o lea ua maua mai e lau Afioga i le sui usufono mamalu. Faaauau le saunoaga.

Susuga MAULOLO TAVITA AMOSA: Faafetai. E pei ona fai atu, matou te...

FOFOGA FETALAI: Mo le faasaoina lava o lou taimi lau Afioga Tuisamau, se i tulai mai lau Afioga i le Minisita o Faatoaga.

Susuga Hon Laauli Leuatea Polataivao Fosi: Lau Afioga na ona ou toe fia piiama lava i le fofoga o le Afioga i le Minisita e palelai ai le matagofie o lau saunoaga. Tuisamau, sa faalogologo lelei ma le totoa i le tofa faalele, faafetai. O le fatu lena, o le fatu atoa lena. Aua la le momolia mai na o i inei, ae momoli ane foi i ina, leaga o le iuleo lea, e le o se itu tetee, o le Itu Agai. A o faaupuga ia e lele i fafo, ia lena e faafofoga le atunuu, o le ala le toa foi lena o le tai i le tatou Nofoaiga. Ae lafo atu, lafo atu o lena e i ina le tofa. We have a beer, the best beer in the world, a ua uma ona sell share a le Malo. Lea e tau fofo atu nei. Faafetai i le taula lea ua sau, own by our own people. Lea e tau toe tilotilo le Malo e toe faafoi mai le mea tonu lava lea e te saunoa i ai. Airline, o anafea na tatou o ai i le Polenisia? Lele lava tau i le masina, vaalele Amerika, Hawaii, Peretania, Ausetalia, soo le lalolagi, a o le a le mea na tupu? Ua le run faapisinisi, ae run faapolokiki, lea e tupu ai nei le mea lea e tupu i le taimi lenei. Ae faafetai o lea ua e toe momolia maia le feau lena, ia lafo mai laia, e le o faigofie le galuega lea e fai ina ia aua ne i o tatou toe oo i le mea lea ua uma ona tatou asa mai ai, le faaletonu lea e i ai. O ai e amoa? E amo e le atunuu.

Ae faafetai i lau faamalosiau o lea ua manino, ae na ona ou toe tulai atu lava e momoli atu le tulaga lena, ua uma ona i ai, ae o le tau faatulagaga lea se i tatou toe faafoi lava le mea sa tatou i ai i le tulaga e tataua ona i ai mo le lumanai. Ae faafetai le tofa.

Afioga Hon Toelupe Puumulinuku Onesemo (Minisita mo Fesootaiga ma Faamatalaga Vavave Faaneionapo): Lau Afioga i le Fofoga Fetalai pe maua se avanoa faamolemole?

FOFOGA FETALAI: Mo le faasaoina lava o lou taimi Tuisamau, se i tulai mai le Afioga i le Minisita o Fesootaiga.

Afioga Hon Toelupe Puumulinuku Onesemo: Na pau le mea o lo o fia malamalama ai lou sui usufono aemaise si ou itumalo ona o lo o faafogafoga tapuai, o le agaga foi lele ina ia manino mea uma ia ma le galuega a lenei itumalo o le tekonolosi. O si ou itumalo, o le fiafia ia i le mea lea o le tekonolosi. O lea la e pei ona taua Frank Zappa, ia lea ua ou talosaga atu i lou itumalo e goggle ifo po o ai Frank Zappa, leaga o le tagata pese lea e tu mai i i e pei e ese ona uiga. O le mea la lea na ona fesoasoani atu i le sui usufono, se i faamanino mai po o ai Frank Zappa. Ma le agaga faaaloalo lava.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai na ona ou...

FOFOGA FETALAI: Ia se i tulai mai le... E te faauilavea i o pe e te...

Tofa Hon Lauofo Fonotoe Nuafesili Pierre Lauofo: Ia, ou te faauilavea i le sui usufono lea e saunoa o Tuisamau.

FOFOGA FETALAI: Ia saunoa lau Afioga i le Sui Taitai.

Tofa Hon Lauofo Fonotoe Nuafesili Pierre Lauofo: Leai e faamanatu atu i ai, o le tatou Vailima, manatua foi o le beer o le Vailima na faavae i le 1979, le fale pia lea a tatou. Sa i ai la le faigapaaga a le Malo o Samoa ma le Malo o Siamani, le isi kamupani Siamani, le Brahoussen. Ia o lea la na sau sau amata loa tatou ua tatou see i le mea foi lele ua amata ona privatize, faasee ese le malo mai mea o pisinisi ia. Lea la na faatau ese ai share a le Malo, a o la e tele lava sea o tagata Samoa la e i ai i totonu, tagata o le atunuu. O la e foi e i ai nai au share, e ui lava ina leai sau tupe o maua ai, a o la e i ai.

FOFOGA FETALAI: Ia, faaauau lau saunoaga Tuisamau, lea ua... ia e le o toe mamao foi lou taimi.

Susuga MAULOLO TAVITA AMOSA: Lelei. O le uiga o lau faamatalaga, faafetai mo le faamalamalamaga o lea foi e maua. Peitai, a lau atu le tagata foi lele tuu mai le pia lea a Samoa, e le fesiligia o ai shareholders a le kamupani lea po o ai. Na pau lava le mea e vaai i ai, o le pia a Samoa, pau lava lene o le uiga o lau faamatalaga. E le auililia po o le a, pau lava le mea e tilotilo i ai, e fia awards ia na maua e le pia lea o le Vailima ma le Taula? Na pau lava lene o le mea e fiafia i ai, a tatou o i Samoa, manaia. Ae o le tulaga po o ai la e vaai le pia o faatau po o le Malo po o le a, e leai, e pei foi o tatou. O tulaga faapena. Ae o le tulaga i le vaalele, ia sau loa se manatu, faafetai o lea e i ai le tatou vaalele lau Afioga i le Minisita o Galuega Tetele, ae aua la ne i gata i i Amerika Samoa i tatou tuaoi. Ae se lototele. Sa ou faapea e te tulai mai nei o le a sue se vaalele V8, ae leai o lea lava e matagofie mea uma ua avatu le faatuatua. O matou na ona matou tuualalo, ioe. Ae, ia tefa le tauala i lo outou finagalo. Ia ona faapea lea, toe faafoi mai le upu lene i le vaalele e te ita ai foi lea ua tulai mai foi ae se i faauma atu ona uma lea.

FOFOGA FETALAI: Ia, malie lau Afioga, Tuisamau, leaga o lea ua taua le Afioga i le Minisita. Saunoa le Afioga i le Minisita.

Susuga MAULOLO TAVITA AMOSA: Ia lea se i ou fai atu e toe aveese ia upu, ae...

Tofa Hon Olo Fiti Afoa Vaai: Lau Afioga i le Fofoga Fetalai, e leai, ou te malamalama lelei lava i lou uso a sui usufono, aua e faalagilagi lava o Tuisamau, ae a ma pauu atu i Vaituutuu, ia o maua ma le uso, ia ma le fetalaiga foi ia Leaula. Ae leaga o lea ua saunoa mai e faa-V8, ia aua e te mulimuli i faamatalaga ia e o ifo i lalo o togatogo tulou le Maota, i le mea la e i autafa o le umukuka, aua e te mulimuli i ai, e sese. Silasila foi lau Afioga le uso a sui usufono i le manaia o le taotoga o le tatou Fono i lenei vaitau, ua fai ma le mamalu, ua saoloto outou finagalo, ua tuu atu lava lenei Itu e aumai outou finagalo ia manino, ae matou usiusi lava si a matou faalogologo. O aga ia sa momoo i ai matou nei e toafa a o matou Itu Agai. Ae a le taimi lenei? O le tofa lenei a le Faigamalo lenei le Afioga i le Tamaitai Palemia ma le... Ua le toe logona ni upu mamafa i totonu o le Maota lenei, e lalau le fiapoto, faavalevaea, le iloa se mea, o le a foi ma le isi mea Laauli? O upu na sa tatou faalogologo i ai i totonu o le Maota lenei. O lea ua faafogafoga Samoa...

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, se i faafesili atu lava po o le a le vaega i le Tala o le Tupe lea e saunoa i ai le Afioga i le Minisita.

Tofa Hon Olo Fiti Afoa Vaai: E leai o lea ou te talanoa atu... e a pe a se i uma atu...

FOFOGA FETALAI: Se i maea mai pea le

Tofa Hon Olo Fiti Afoa Vaai: A o lea ua faafogafoga Samoa i le taotoga o le Maota lenei, ua le gata i le taoto i le filofilo i ai o le Agaga o le Atua, a ua matua taoto i le avafatafata faale-aganuu. We are all free, o matou ma outou, le mea lenei o lea ua ou tulai atu ai lau Afioga i le Fofoga Fetalai, ia tatou faafoi le viiga i le Atua, ua le toe logona se faausili totonu o le Maota lenei. O lea ua seese malie lava lo tatou sa, faafetai tele atu lava i a outou Afioga.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, se malie lou finagalo.

FOFOGA FETALAI: Se i tulai mai lau Afioga i le Sui Taitai...

Tofa Hon Lauofo Fonotoe Nuafesili Pierre Lauofo: Ou te le o iloa po o ai lea e agai i ai le saunoaga a le Afioga i le Minisita. O ai ea lea e te agai i ai? O ai lea e saofai atu i i lea e agai mai i ai au lauga?

Tofa Hon Olo Fiti Afoa Vaai: O lea ou te talanoa i tuanai atu.

Tofa Hon Lauofo Fonotoe Nuafesili Pierre Lauofo: Ia, o le a e talanoa i tua, o lea matou te nonofo atu. Ia talanoa mai ia matou.

Tofa Hon Olo Fiti Afoa Vaai: O oe la le isi faasausili sa i ai.

FOFOGA FETALAI: Ia malilie ia, lau Afioga i le Sui Taitai...

Tofa Hon Lauofo Fonotoe Nuafesili Pierre Lauofo: O lea ou te fesili atu i lau Afioga i le Fofoga Fetalai, i le faafoefoaina o le tatou Fono. Ona o lea ua taoto lou finagalo, e faauma nei lauga. Ae afai o ituaiga mea ia o lea o le a agai i ai, ou te le iloa lava po o fea le mea e.... le fono.

Tofa Hon Olo Fiti Afoa Vaai: Sa ou musu lava e fesili.... ou te tautala atu i le sui usufono lea, leaga e ia te au le ava ma le faaaloalo i sui usufono mamalu o itumalo. A o le mea lea e i ai... le pispisia o nisi o saunoaga i upu ia sa fai i totonu o le Maota lenei.

FOFOGA FETALAI: Ia malilie ia a oulua afioga, lafo maia i le Nofoa e faauma le tatou mataupu.

Tofa Hon Lauofo Fonotoe Nuafesili Pierre Lauofo: Afai o au mataupu na e aumai e agai i nisi o i tua, se i alu i tua e alu i luga o le TV lale e fai ai, ae aua le aumaia i totonu o le Maota, leaga o lea e le o i.... na e te talanoa i ai.

Tofa Hon Olo Fiti Afoa Vaai: E faamolemole lau Afioga i le Fofoga Fetalai, aua tou te faataitai i mea na... talanoa ma ii i talanoaga a le sui usufono lava latou...

FOFOGA FETALAI: Ua lagona le faanoanoa ia oulua, ia malilie maia lau Afioga i le Minisita ma lau Afioga i le Sui Taitai... se o tatou e...

Afioga Hon Loau Solamalemalo Keneti Sio (Sagaga 1): Lau Afioga i le Fofoga Fetalai, e tulai atu ma le ava tele...

FOFOGA FETALAI: E pale i le feavaavatai ma le faaaloalo i le tatou Maota nei, e pei lava ona outou saunoa. Ua ou manatu foi, e leai o lea lava

sa tuuavanoa atu foi ona o nai fesoasoani, ae o le a maumau ai le taimi o Tuisamau ma lana lauga manaia ma le matagofie i lenei taeao. O le mea lea, ua ou faamalulu atu i le Maota ma le faafogoga mai a Samoa ma le atunuu. O le a foi se tu ma se aga, ou te talitonu lava o le a vaatele i lo outou finagalo.

O le mea lea, e faamalulu atu, o le a faaauau le saunoaga a Tuisamau, ua toeitiiti lava uma lona taimi.

Tofa Hon Olo Fiti Afoa Vaai: Lau Afioga i le Fofoga Fetalai, ia, ua ou tulai atu ma le agaga faaloalo e faamalulu atu i lau Afioga ma le faafogafoga a le Maota nei. O le a foi se upu ua le tautamalii ma se aga, ia e faamalulu atu ma faamagalo le sui usufono nei. E leai o lea lava sa agai lau faauilavea i le sui usufono mamalu o Sagaga le Usoga, ae faamalulu atu, faapea le faafogafoga a le tatou atunuu.

FOFOGA FETALAI: Malo faafetai. Se i tulai mai lau Afioga i le Sui Taitai.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, o le Afioga i le Minisita nei, e leai, o lou uso, o lou uso tuofe lava, ua leva foi ona ma masani ma ma faifaimea faatasi. A o aga lava na o le aso, aua e le mafai foi ona matou nofonofu pe a faalogologo atu, ua ese le mea la ua agi agai i ai le tatou mataupu, o lena foi na tulai atu ai se tala. A o le a foi se upu, ia e faamalulu atu foi i lau Afioga ma le Maota ma le faafogafoga a Samoa, ona e faapena lava uiga o le tatou Fono e tatau lava ona avatu so matou foi lagona. O le matou faamatalaga lena, ia manuia le Fono i lau Afioga.

FOFOGA FETALAI: Faafetai o lea ua lagona foi e lau Afioga i le Minisita ma lau Afioga i le Sui Taitai leni aso, leaga o le aso leni e tusa ma le Tusi Faitau Aso a le EFKS, o le taimi vevesi. Ioe, o le taimi vevesi, o le aso vevesi. Ona sau ai lea o le tala lena i le toalua o Iopu, aua o i ina na ui mai ai Satani, na ui mai i le toalua o Iopu. Ma ua fai le tala a le toalua o Iopu ia Iopu, “Ia, a e saga faamaoni lava i le Atua, ae le faifai ia i lou Atua ma e oti atu ai?” O le a le tala a Iopu, “Oi a tatou talia mea lelei ae faapefea mea faaletonu?” O le uiga lena o le aso leni. E le mafai ona alo le faaaliga o le Silisili Ese ma le mamalu o le Atua i le Maota leni. O le mea lea, afai ua lagona e lau Afioga i le Minisita ma lau Afioga i le Sui Taitai, o lagona na o le Nofoa, ia tatou alolofa i le Maota ma lona mamalu, ma le Silisili Ese o le Atua o lo o i totonu o le Maota leni. O le mea lea, ia aoga foi leni aso, ae aua ne i galo ia i tatou, o le faaaliga lava o le mamalu o le Atua o le filemu ma le toamalie.

O le mea lea faaauau le saunoaga a lau Afioga i le....

Afioga Lupematasila Galumalemana Tologata Togia Tile Leia (Falelatai ma Samatau): Lau Afioga i le Fofoga Fetalai...

FOFOGA FETALAI: Ia malie le sui usufono mo Falelatai ma Samatau, ou te le toe talia nisi tulaga o lea ua uma ona fai atu le tala a le Nofoa. Ia faaauau le saunoaga Tuisamau.

Susuga MAULOLO TAVITA AMOSA: Faafetai. E ese lava le matagofie o le matau o le tatou folauga i lenei aso ma lenei taeao. E leai e taua foi nai taimi faavesivesi faapea, aua e i ai taimi a tatou e masani ai, a alu alu se mataupu, e i ai foi nai taimi e fai ai nai tulaga faapea, e faatei ai foi e o lo o faafofoga ma e lava e le o malosi le faafofoga mai. Ae pau lava lea o le mea na ou fia pai i ai, tulou le faafofoga mai a lou itumalo o Sagaga 2, ona ua taua foi e le Afioga i le Minisita o ...

FOFOGA FETALAI: E toe lua minute o le sui usufono.

Susuga MAULOLO TAVITA AMOSA: Le tulaga lea, i lo ma va faa-Saleaula, ona faapea lea, Levao, tulou lava paia o lou faasinomaga. O tulaga faa-Saleaula, e malu ma toa i ai le tai, ioe, e fesoasoani ia Safotulafai. E pei ona ou taua muamua foi le suafa o lou afioaga lena e te pale mai ai, e silafia e Samoa tulaga faapenei. Afai e moni lau saunoaga, faafetai i lo outou manatu i la outou anava, e tuu mai le avanoa e tiutalaloa ai se lagona e fai atu. Aisea sia mea ma faauilavea, sia mea ma faauilavea, ia o lea toe afa minute lou taimi. Ua uma lou taimi i la outou faauilavea. O le a la le avanoa lea, e ese foi lea ituaiga sauaga lea e feagai ma matou, se i tulou.

Ae a faapea e moni, o a mea, a o lau toe fautuaga, a o a ni mea na tulai mai i ia Paeaiga i lo outou taimi, alofa faasola i nuu le aina. Ia tatou saili so tatou taeao fou. E le malamalama foi lou tagata ma matou o sui usufono fou, afai na i ai ni tulaga faapena, ia tailo ou te le toe fia oo i ai, ae tuli i luma so tatou ai. O la ta ita lea tatalo atu faa-toeaina. E ui lava o lea e tamaititi faatoa oo mai ananafi, ae leaga o lea... E pei o le mea lena e soso atu ai. Ona faaupu atu ai lea, a silasila ma vaai i ai, e manaia le saunoaga a le Minisita o Faatoaga. Se leaga o le tagata e fai le fatu.

A faapea la e oo atu i le taimi e tatala ai a tatou tuaoi foi ma atunuu i fafo, borders, o lau vaai o le toatele o Ekalesia ua toe fesui ai a latou fonofono tetele seia fai i le vaiata lea. A oo atu la ua maua sina tatou vaalele... a o le mea lea e i ai nei a fia alu, e faatalitali le booking e pule ai lava le Air New Zealand latou ia. E na o tuualalo e avatu, a e o tatou foi e tu le tootoo o le toeaina i le malae, ae nonofo nai toeaina fai mai e tuualalo. Ae fiu e tuualalo, ae pule lava le toeaina la e tu i le tootoo. E pei o le ata lena o lea e i ai le tatou faafesagaiga, ae o le measili o le a se tulaga e oo i ai le tatou folauga o fea e

tau ai. Ae o le mea taua i le matau mai a le atunuu, o lea tatou te limalima ma mulumuluaufoe faatasi.

Ia o se faamatalaga lena e pei e toe avatu ai se aoatetele, ona ua tau sola foi le faafofoga foi le faafofoga a le Palemene ona o le tele o a outou faauilavea, ma sauaina ai lou avanoa.

E faapea, o le mea muamua, toe silasila fetuunai faamolemole, faamolemole atu, lafoga o tau o mea ia o basic food items, aemaise lava mea e aoga i le tausiga o le fanau laiti, a pau mai le 5%, manaia.

O lona lua, selesele limalelei pea ma faaauau la outou lufilufiga o le tamaoaiga o Samoa. A ua fai le ave i tua o tai \$1 miliona, o a nai mea o totoe i le muli o le ola, e tau lava o sina mea se i namu lalaoa ai le tapuaiga ma le galuega a le afaigaluega a le Malo. Ua lava se 10%, a laititi tele po o le 7%, a.a.a. se ua lava ma totoe lena e tali ai foi lo latou manao.

Ma le mea mulimuli lea, se ua ou tau fefe e fai atu se i lenei mea o le vaalele, i faauilavea mai foi, ae faapea... Le paia e ma le mamalu o lenei Fonousu i lau Afioga i le Fofoga Fetalai, ua faamalo faafetai. Ua faafetai foi le tauatai mo lenei galuega, ua faafetai lava le lototele. E faapena foi lena Itu o le Malo i le Afioga i le Tamaitai Palemia, aemaise o le tulai mai o lau Afioga i le Sui Palemia.

E pau lava le fautuaga i lou uso a Sui Palemia, se soia ia e te fai, ma fai mai a sese ua avatu foi lau tusi ia oe, se faatamalii a tatou mea. Ona pei lea o le agaga la e saunoa ai le Minisita. E le aoaia e Laupua, Tamafaiga, ae afai ua tatou liliu i le tulaga o le vafealoai, se vagana ua tatou le mafai ona foia faalotoifale o tatou feeseeseaiga, ona tatou o lea i le Tulafono. Ae a tatou taumafai lava i ai, pe mamaioa, mamaitaloa, e i ai lava tulaga e mafai ai ona tatou faia ia mea uma i le faatasi mai o le alofa o le Atua.

FOFOGA FETALAI: Ua maea le taimi o le sui usufono.

Susuga MAULOLO TAVITA AMOSA: Ia, ma ua maea foi ma lau folasaga. Faafetai tele i le tapuaiga a Samoa aemaise lou itumalo. Ia manuteleina la oulua taumafaiga mo se tatou vaalele, aua le masina fou. Soifua.

FOFOGA FETALAI: Ua malo saunoa, faafetai foi le tofa, faafetai foi faasoa Tuisamau. O lea lava ua lagonaina lau fautuaga. E maoti foi ma manino fautuaga e pei ona tuuina mai, ia o lea foi ua faamaumau e le tatou Kapeneta ma le Malo. E talitonu lava o le a oo i ai le tofa a le Kapeneta. Ae manaia lava le faaofi mai o lou finagalo, o lea foi ua manino. Ae faafetai mo le faasoa, faafetai foi mo le lava onosai. Ma aveese ou lagona faapea ua sauaina lau saunoaga, e leai o uiga lava o le Palemene ua masani ai. E faapena, e avatu aumai, ae taunuu lava i le taunuuga filemu. O le mea lea, ia aua le faapoleina lou lagona faa-Tuisamau. Ia manuia lou tootoo.

Ou te iloa o le taimi lenei i lau Afioga i le Sui Taitaifono ma le faaaloalo. Lau Afioga Honourable Tapunuu.

Afioga Hon TAPUNUU NIKO LEE HANG: Faafetai mo le avanoa ua tuuina mai e lau Afioga i le Fofoga Fetalai. Sa manatu se i uma le tatou malologa ou lauga lea, ae leaga o lea ua e faatonu mai au, ae faafetai tele mo le avanoa.

A o le i faia se lauga a lenei sui usufono, lau Afioga e talosaga atu i Minisita o le Kapeneta, se i tuu mai pea le avanoa. Ua uma ona saunoa mai Olo ma Laauli i le taeao lenei, e free matou, aua ne i toe faalavelave mai outou... se i tali mai a matou fesili ia e avatu, ae le o le faalavelave ma faauilavea, e toe seu ai a matou tapenaga. O lau talosaga lea ma le agaga faaaloalo. A tulai ae foi la se Minisita e tau faalavelave mai, ona e taofi lea faamolemole. Ou te le o faatonuina lau Afioga, ae na o se tuualalo.

Susuga Hon Laauli Leuatea Polataivao Fosi: O si mea lava e fia faasao lau Afioga i le Fofoga Fetalai. E leai o le saunoaga a Olo lea na saunoa atu ai, o lea ua outou saoloto, o le faasaoga lena. A o a outou saunoaga e le tuua saolotoa, a i ai lava le mea matou te lagona e tatau ai ona faamalamalama pe faasao, e tatau ona faasao. A o lea ou te taumafai atu i le saunoaga a Olo, you are now free. Ioe. E pei o le mea sa matou i ai ina ua matou foi saoloto.

Ae pei o le faamalamalama lena, malie lau Afioga i le Minisita, e faatoa matou tulai atu lava pe a i ai se mea e tatau ona faamalamalama, lau Susuga Papalii.

Tofa Hon Olo Fiti Afoa Vaai: Lau Afioga i le Fofoga Fetalai, leaga o au lea na faia le upu. E malie e saoloto le avanoa, ae le saoloto ni lafoga e aumai i le Malo. Ma le faaaloalo.

FOFOGA FETALAI: Ia, ou te iloa e malamalama foi lau Afioga i le sui usufono, lau susuga i le Sui Taitaifono o le tatou Komiti.

Afioga Hon TAPUNUU NIKO LEE HANG: Ua malamalama lelei lava i le faamalamalama a le tofa i le matua, aemaise foi lou uso ia Olo. Ma o lau lauga, e leai lava ma ni mea e lavelavea ai fua le tapenaga a le tatou Faigamalo, ma ou te talitonu foi e le tatau lava ona faalavelavea. Ae tapuai mai ma faalogologo mai, i nai fautuaga foi e taatia atu, aua o matou na ona fautua lava, ae pule lava outou aua o outou lea e pule aoao i le Malo.

E na o se talosaga vaivai lea, ina ia faasaoina lou taimi, leaga o lea e taumafai e maea nei le tatou Fonotaga. Ia ae faafetai o lea ua malamalama foi le fesili, a o le freedom la lea e faapea e saoloto ai a matou lauga, ae aua ne i avatua ni mea foi ia e toe fesiligia ai, pe o le sao lea? Ae o le a ou

taumafai lava e avatu ni faamatalaga, e aua ai ne i faalavelavea lau folasaga matagofie lea ua tapena, ma lou faaaloalo lava.

Lau Afioga i le Fofoga Fetalai, ou te muai faatulou atu i le paia o le Maota ua sasao nei, i le afio o lau Afioga i le Fofoga Fetalai, afio lau Afioga i le Sui Palemia ma le mamalu o le Aiga Kapeneta. Afifio foi Minisita Lagolago o le tatou Malo. Afio foi lau Afioga i le matou Sui Taitai ma lenei Vaega Faaupufai ma sui usufono mamalu uma o le Palemene. Ia malo le soifua manuia i lenei taeao fou, ona o le alofa ma le agalelei faifaiepa o le tatou Tapaau oi le Lagi.

Ou te fia fonofaapipii atu foi i lau Afioga i le Fofoga Fetalai, i le talosaga siitia ua maea tapena i lenei taeao, aua lava lo tatou vatapuia ma lo tatou Atua, le Tama o i le Lagi. Aemaise ai foi o se tatou faafetai ma se viiga e saga viia ai pea Lona Suafa Mamalu, ona o mea lelei ma mea matagofie uma ua Ia faia mo i tatou. Ia viia le Atua.

Ou te fia faapai atu foi i le tapuaiga a lau Afioga i Le Ao Mamalu, lau Afioga Tuimalealiifano Sualauvi, faapea lau Masiofo. Afio lau Afioga i le Sui o le Fono o Sui Tofia, lau Afioga Le Mamea Ropati ma lou faletua. Lau Afioga i le Faamasino Sili ma le Ofisa o le Faamasinoga, lau Afioga i le Peresetene o le Faamasinoga o Fanua ma Suafa, Alii ma Tamaitai Faamasino.

Ou te fia faatalofa atu foi ma faatulou atu i le paia o Samoa o faafogafoga tapuai mai i le Fonousu a Samoa. O le paia lava lea i Tama ma Aiga, Aiga ma latou Tama, le Usoga a Pule ma Tumua, Ituaui ma Alataua, Aiga i le Tai ma le Vaa o Fonoti.

Le paia o le aufaigaluega a le Atua o lo o nonomanu i nuu ma afioaga mai fata faitaulaga e fia, aua se manuia o Samoa.

E faapitoa se faapai atu i si ou itumalo pele o Vaimauga 3, i outou paia ma mamalu i ona tulaga faalupeina. O le a nuunuu atu ia faatini o tausala, outou sa ma faigata e mai i le vavau e oo i le faavavau, ua taoto foi ae ua o se alao.

E faatalofa atu foi i le mamalu i alii ma tamaitai o Ofisa Sili o Pulega o Matagaluega ma Faalapotopotoga o si o tatou Malo, aemaise lau susuga i le Failautusi o le Fono, ia faapea le loaloa o le aufaigaluega, tulou, tulou, tulona lava.

Lau Afioga i le Fofoga Fetalai, e puupuu lava se manatu e fia faaalua i le Tala Faatatau Autu o le Tupe 2022/2023. Ona o au o se sui o le Komiti o Tupe sa lauliliuina lenei Tala Faatatau o le Tupe 2022/2023.

O le tele foi o ni mataupu sa ou manatu e faaalua ua maea ona faaleo atu e ni sui o le matou Vaega Faaupufai ua uma ona sausaunoa i le Tala o le Tupe. Ma e vagana ai nai mataupu taua ia ou te fia tautala i ai.

Lau Afioga i le Fofoga Fetalai, sa faamaonia mai i le matou suesuega, se aofaigatupe e \$28 miliona, ua le mafai ona aoina mai tupe maua mai le tausaga faaletupe 2021/2022. O lou popolega i le tulaga lea lau Afioga i le Fofoga Fetalai, e le gata i le tupe lea e \$28 miliona ua le maua mai i tupe

maua o le 2021/2022, e ui e le i maea le taimi faatatau, e maea nei ia Iuni. Ia talosia ia toe maua mai nisi tupe. A o le popolega lau Afioga, ona o lea foi e atagia mai i le Tala Faatatau Autu Tupe 2022/2023 se tupe pau e \$89,168,188. O le mea moni lau Afioga i le Fofoga Fetalai, a tuufaatasi le \$28 miliona ma le tupe pau e \$89.2 miliona, ona maua ai lea o se aofaigatupe manaomia e \$117.2 miliona, e faatupe ai le budget e maea nei ia Iuni 2022 ma le budget fou o le 2022/2023.

O le fesili la i lau Afioga i le Minisita o Tupe, o fea e faamoemoe le Malo e maua mai ai se isi budget support funding ona ua aafia uma le tamaoaiga o atunuu ia e maua mai ai a tatou fesoasoani e auala mai i tatou developments partners? E i ai se guarantee tatou te maua mai ai le aofaiga seleni lea \$117.2 miliona e faatino uma ai a tatou fuafuaga mo le 2021/2022 aemaise le 2022/2023. Ona o le vaegatupe lea e pau, o lea ua uma ona faatatau i totonu o le tala tupe fuafuaina mo le 2020, a le maua la, o fea a tua i ai tatou i aafiaga o totogi o tagata faigaluega, aemaise o le faagaaoioga o galuega tetele ia ua fuafuaina? Ia o le fesili lena.

Afioga Hon Toeolesulusulu Cedric Pose Salesa Schuster (Aana Alofi 4): Lau Afioga i le Fofoga Fetalai, i se avanoa...

FOFOGA FETALAI: Ia malie ia lau Afioga i le sui usufono mamalu, se i tuu atu le avanoa i lau Afioga i le Minisita o le Siosiomaga.

Afioga Hon Toeolesulusulu Cedric Pose Salesa Schuster: Ia faafetai lau Afioga, e leai e faamalulu atu i lau Susuga i le Sui Taitaifono foi o le Komiti ona o le faafesili, e tusa ai o lea ua ia fesiligia vaegatupe e tusa ma le \$28 miliona lea e le i mafai ona maua. O le faafesili i lau Afioga ona o oe o le Sui Taitaifono o le Komiti, pe i a outou sailiiliga, pe fia se tupe e le i mafai ona faaaogaina e Matagaluega uma o le tatou Malo? O le uiga o lea fesili lau afioga atonu o i e iloa ai foi le tele o le vaega seleni e le i mafai ona faaaogaina i le Tala o le Tupe ua tuanai, ona o le tele o le taimi o le lockdown ma nisi vaega o aafia ai lo tatou tamaoaiga.

FOFOGA FETALAI: Ia faaauau mai le saunoaga a lau Afioga i le sui usufono mamalu.

Afioga Hon TAPUNUU NIKO LEE HANG: Ia faafetai mo le faafesili a le Afioga i le Minisita, ma ou te manatu ou te le talia lea fesili, o la e afio mai le matou Taitaifono. O le fesili la lea e agai tonu lava i le Taitaifono ne i mea ane ua sese sau tali. Ae o le a faamaumau uma lava e le Taitaifono mataupu uma ia, e aofia ai la ma le mataupu lea ua e saunoa ai. O lea e manino lava lau faaaliga i le tupe lea pe... o tupe ia e faapea e le i faaaogaina, ia se i tali mai le Taitaifono i lau mataupu, ae se i faaauau pea lau folasaga

matagofie. Ia o lou popolega lea lau afioga ne i mea ane ua le maua nei tupe fuafuaina, ae o lea ua alu i totonu o le Tala Faatatau Autu o le Tupe, ona le maua lea o ni tupe e faatino ai fuafuaga a le Malo. A o lau fesili la lea, pe o i ai se Plan B mo se fuafuaga ina ia maua tupe ia? ia aua ne i poloka le faagaioiga o galuega o lea ua fuafuaina mo le Tala Faatatau o le Tupe 2022/2023. A maua mai lava se guarantee, ua uma foi le popole o lenei sui usufono.

Ua ou maua se tala faapea o le a tele se suiga o tatou tupe maua pe a toe tatala a tatou borders ma toe tele ai ni tatou tupe mai turisi. A o le fesili lau Afioga, o lea foi ua faaitiitia le paketi a turisi i le \$10 miliona, po o aafia la le marketing strategy ma le promote ina o le tatou atunuu ina ia toe faatuputupu le tulaga o turisi e asiasi mai ia tatou aemaise o lenei vaitaimi ua taugata pasese. Ma le tulaga foi lele o le popolega o tagata e femalagaai solo ona o le faamai.

Ona oo mai lea i le isi au fesili i lau Afioga i le Minisita o Tupe, i le tulaga lea o lo o i ai le tatou foreign reserve. O le taua ia te au...

Tofa Hon Olo Fiti Afoa Vaai: Lau Afioga i le Fofoga Fetalai,

FOFOGA FETALAI: Ia malie le sui usufono, se i tulai mai lau Afioga i le Minisita o Galuega.

Tofa Hon Olo Fiti Afoa Vaai: E lagona lava le faanoanoa i i le tulaga o le saunoaga a le Afioga i le Sui Taitaifono. O lea ua toe fesili le Sui Taitaifono i le Taitaifono ma le latou Komiti na tuuina atu ai le iloiloga o le Tala o le Tupe. E le tatau ona toe fesili mai, o ai lea e fesili agai i ai, o matou e tatau ona fesili atu i le Komiti o Tupe a le Palemene. A o le avanoa foi lea o lea e tuufesili ai foi le Sui Taitaifono a le Komiti o Tupe, sa tatau ona fesili i Ofisa Sili o Pulega o Matagaluega, ma Faalapotopotoga lea e agai atu i le latou faatalanoaga. A o lea ua toe fesili mai i i, o le mea lena e tau maua ai lou le faamaoni i au fesili e tatau ona e fesili i Matagaluega e faamalamalama atu se tulaga o lo o e fia malamalama ai. O lea la ua feteenai outou i totonu o le Maota. O lea ua e fesili, ou te le... a toe tali atu ma le Taitaifono o le Komiti o Tupe. Ua matou le malamalama ia outou ma la outou Komiti.

FOFOGA FETALAI: E pei o le agaga foi lena lau Afioga i le sui usufono mamalu, o lau Afioga foi o le Sui Taitaifono o le tatou Komiti. O lea ua matau atu, e pei o lea o le a toe feteenai ma fesili foi ma le tou galuega sa faatino, e pei ona saunoa le Afioga i le Minisita. O le tatou Maota nei o lo o faatalitali atu i finagalo faaalua o la outou Komiti ma le faagasologa. Ae o lea o le a e toe fesili mai, o le tulaga lena. Ua lava foi lou silafia ua leva ona e i totonu foi i tulaga tau Komiti aemaise foi o le Minisita o Tupe, o le ala lena o lea e tau faasoso atu ai se agaga, e pei ona saunoa le Minisita. Aua ne

i fetuiai a tatou galuega aua e tupu ai le nunumi o le faafofogaaga a le Maota, aemaise o le faafogafoga mai a le atunuu, ona avea lea ma se mea faafaigata.

Ia alofa lau Afioga i le sui usufono mamalu, e leai o la outou galuega lea e faalagolago i ai le Maota. Ma le agaga faaaloalo, faaauau le saunoaga.

Afioga Hon TAPUNUU NIKO LEE HANG: Ia faafetai i lau Afioga i le Fofoga Fetalai. Ou te manatu e le o malamalama le Afioga a Olo i mea o faiga faavae. E le mafai ona ou fesili i ni sui o le Matagaluega, o faiga faavae ou te fesili i le Minisita. O le ala ae lea o se manatu, o le taimi lenei e tatau ona ou fesili ai. Ae faamalulu atu i lau Afioga pe a faapea ua le talafeagai foi lau... E ala ona ou tuua le fesili lea a le Minisita i le Taitaifono leaga e tatau ona tali le Taitaifono i so o se fesili e aumai, o lou faaaloalo foi lea i le matou Taitaifono. A o manatu ia e faaali atu, o manatu lava o le sui usufono ia.

FOFOGA FETALAI: Ia leaga o lea ua taua mai le suafa o le Taitaifono, se i tulai mai lau Afioga...

Afioga Faleomavaega Titimaea Tafua (Taitaifono o le Komiti o Tupe Maua ma Tupe Totogi): Ia malo. E faafetai atu lava mo le avanoa i lau Afioga i le Fofoga Fetalai. E leai o vaega ia e taua e le Afioga i le Sui Taitaifono, o ana lava ia suesuega i tua, e le aofia i totonu o suesuega a la matou Komiti. E faafaigofie mo le faafofogaaga a le mamalu o le tatou Kapeneta, ma sui usufono mamalu uma a le Palemene. O ana lava ia suesuega i tua, e le i aofia i totonu o a matou suesuega. Ma le agaga faaaloalo.

FOFOGA FETALAI: Ia, o lea ua matau atu e le Nofoa, ae talitonu foi, o lea sa avatu le faalagolago a le Maota i la outou Komiti, a o lea ua matau atu, o lea e pei a feeseeseai ona o isi saililiga i tua atu o la outou galuega.

O le mea lea, e fautua pea i le sui usufono mamalu, ia tau tatai lou finagalo i le tatou faamoemoe o lenei aso...

Afioga Hon Loau Solamalemalo Keneti Sio (Sagaga 1): Lau Afioga le Fofoga Fetalai...

FOFOGA FETALAI: Ina ia faapena ona taugamalie i le faafofoga a le Maota ma le atunuu le faamoemoe o lenei aso.

O le mea lea, o le fautuaga lena i lau Afioga i le sui usufono mamalu...

Afioga Hon Loau Solamalemalo Keneti Sio: Ioe lau Afioga i le Fofoga Fetalai, e fesoasoani atu ona e pei a foliga mai o le a le ogatasi le futia ma le umele i le... Ae o lea ua saunoa sao le Taitaifono, o fesili lava a le sui usufono

i tua atu e le i talanoaina. Faafetai lava o lea ua ou malamalama foi Faleomavaega e tusa ai ma lau faamalamalama.

FOFOGA FETALAI: Ia, talu ai ua tatou taunuu i le tatou taimi malolo, ia, o le a tatou malolo. E faataatiaese Galuega a le Fono Aoa mo malologa o le taeao.

Na faataatiaese Taualumaga a le Fono Aoa Faitulafono mo lana malologa masani i le itula e 10:30 ma toe faaauau i le itula e 11:00 i le taeao.

FOFOGA FETALAI: Ou te faasilasila atu ua toe amatalia nei Taualumaga a le Fono Aoa Faitulafono.

E i ai le manatu ua matu i fau le taligasua ma le tauteaga a le tatou Maota, ua maua foi se faasiligamalosai i le paia o le Palemene e faaauau ai le tatou galuega. Malo le onosai.

E faataatiaese le tatou galuega mo le malologa o le taeao, o lo o saunoa le sui usufono mo Vaimauga 3, ma o le Sui Taitaifono foi lea o le tatou Komiti o Tupe. Na ona faamanatu atu pea i le sui usufono o lo o saunoa, lau Afioga i le Sui Taitaifono, tasi lea matafaioi a la outou Komiti ina ia suesue faiga faavae aua lava le tamaoaiga o le atunuu. Ia o le faamanatu lena a le Nofoa ina ia agai tonu i ai saunoaga ma tuleiga i le tatou Tala o le Tupe. O le mea lea, lau afioga i le sui usufono mamalu, tulai maia e faaauau lau saunoaga.

Afioga Hon TAPUNUU NIKO LEE HANG: Ia, faafetai atu i lau Afioga i le Fofoga Fetalai mo le avanoa e toe faaauauina ai le saunoaga matagofie a le sui usufono mamalu.

Ae fai le tatou malologa lau Afioga ua oo lau tautalaga i le tatou foreign reserve. Ia o le tasi foi ia o mataupu e lavea i faiga faavae a le tatou Malo.

Afioga Hon Mulipola Anarosa Ale Molioo (Minisita o Tupe): Lau Afioga i le Fofoga Fetalai, pe maua se avanoa.

FOFOGA FETALAI: Malie lau Afioga i le sui usufono mamalu, se i tulai mai la le Minisita o Tupe, e lelei foi lava le fai ma avatu sina tala a le Minisita e faafilemu ai foi le faafofogaaga a le Maota ma le tatou atunuu.

Se i tulai mai lau Afioga i le Minisita o Tupe.

Afioga Hon Mulipola Anarosa Ale Molioo: Faafetai i lau Afioga i le Fofoga Fetalai mo le avanoa. Ia e leai foi se agaga e faalavelave i le folasaga matagofie a le Afioga i le sui usufono po o le Sui Taitaifono o le Komiti o

Tupe. Ia ae atonu ua outou matauina, e le o gagana lava le Minisita o Tupe e tusa ai foi ma le Tala o le Tupe ma fesili foi o lo o tuuina mai, ona o lo o matauina, o lo o tutulalai atu pea le matou Itu e fesoasoani i le taliga o tatou fesili, ae o lo o usitaia pea e lou sui usufono Tulafono Tumau a le tatou Maota, e i ai pea lou avanoa faa-Minisita o Tupe ou te talitali atu ai e tusa ai foi o ni mataupu laga mai i totonu o le Palemene. Ae tau lava ina ou faamanatu i le tatou Palemene, e tele ni fautuaga ma tuualalo ua tuuina mai, ae toe faamanatu atu pea i le tatou sui usufono ia Tapunuu, leai, sa e nofo foi i le nofoa o lo o ou nofo ai i le taimi lenei faa-Minisita o Tupe. O fesili foi o lo o e fesiliina, o lena lava e te silafia tali o fesili, aemaise ai foi o oe lava o le Sui Taitaifono o le tatou Komiti o Tupe, ia ua ave ai foi le faatuatuaga a le tatou Palemene.

Ia, ua e fesili foi po o le a le Plan B, o le Plan B, o le folau ma le faatuatua. Ina ua toai taunuu mai le tatou Malo fou, na feagai lava ma luitau i le amataga, e le i atoa se 12 masina talu ona i ai le tatou Malo i le taitaiina o le tatou atunuu, a o lo o feagai lava ma luitau.

A o le tali atu lena, e folau lava ma le faatuatua i le Atua o lea e to ai manu e ala i le tatou Tala o le Tupe ma le tatou paketi. Ia, ou te faafetai foi i ou tuagane faa-Minisita o lo o tulai atu e talitali. I le tulaga lava ia o faafiatiaga faa-Samoa, e i ai le mea e tau o le faatafiti. O le faatafiti la lea e tutulai atu ai Afioga i Minisita, ae i ai le tualuga, ou te tali aloaia atu ai, ae taatia mai le tou faatuatuaga o le a faamaioio ma faamanino ma faamalamalama fesili uma o lo o fesiligia agai i le tatou Tala o le Tupe. Ma le faaaloalo lau Afioga i le Fofoga Fetalai.

FOFOGA FETALAI: Malo faafetai malele foi i lau Afioga i le Tamaitai Minisita o Tupe. Ia, ou te talitonu foi o le saunoaga lena o lea ua uma foi ona agia i totonu o le Maota lau saunoaga foi i le Tala o le Tupe. Ia o le tulaga lava lena, ma ou te iloa o le tali manino lava lena o nei mea uma ma nei faafitauli, o le folau lava ma le faatuatua. E talitonu foi o le sui usufono mamalu foi e i ai foi ona tofi i le Ekalesia, e talitonu foi i le Atua, folau ma le faatuatua e maua ai lou fesoasoani. Faaauau lau saunoaga le sui usufono mamalu.

Afioga Hon TAPUNUU NIKO LEE HANG: Ia, e faafetai atu i lau Afioga i le Fofoga Fetalai mo le faaauauina o le lauga a le sui usufono. Faafetai atu foi i lau Afioga i le Tamaitai Minisita mo lou fesoasoani mai foi i le faatalanoaina o le tatou Tala o le Tupe. E i ai nai manatu ia ua e saunoa mai ai pei e tali faatafiti mai ia Afioga i Minisita. E le manaomia e lou sui usufono ni tali faatafiti. O lea la, onosai se i uma lau saunoaga matagofie, ona e tali mai lea i fesili ia e avatu aua o lau Afioga lea e... ona o faiga faavae lea ou te talitonu e ala ai ona ou fesili atu faapea. O fesili foi ia ou te le soona... ae ala ona ou fesili e fia malamalama lou sui usufono aemaise ai

foi le mamalu o le Palemene, leaga o le aafiaga o tatou pe a le lava le tatou foreign reserve, o le a le maua mai tatou oloa masani, meaa, meataumafa, lea e aafia ai mea o building materials, mea o lo o manaomia i lenei vaiatau aemaise le suauu, le penisini. Ae a e saunoa mai lava o lea e lava e 6 masina le reserve la e i ai, ia ua toa foi uma ai lava, ae faafetai i le malosi o lou faatuatua, aua leaga e talitonu o le tou Vaega o le Faatuatua i le Atua ua Tasi. A malosi la lou faatuatua, ia e tali mai lava le Atua i manaoga o le tatou atunuu e ala mai i lau Afioga i le Minisita, a e faafetai i lou fesoasoani mai foi i le tau tapenaga atu o le lauga.

O le auga lava o le taumafai atu ina ia maua se fesoasoani e tapena ai le tatou Tala o le Tupe, ona o le tulaga pagatia lea ua i ai tatou, ua le o toe malosi le tatou economy. Ia o nai fautuaga uma lava e agai lava i se tulaga e toe faamalosi ai le tatou economic growth. O le agaga tonu lava lea o le taumafai atu o ni fautuaga, ae avatu pea a talia faafetai, viia le Atua. Ae a leai foi, ia toe fafoi mai manatu o Tapunuu ia e teu e ia ia, ma faamoemoe i le Atua e aoga i se isi galuega e fesoasoani ai foi i le tatou tamaoaiga.

Ia, lau Afioga i le Fofoga Fetalai... O le mea lea o le tele o faauilavea ua le iloa po o fea lea e gata ai le lauga.

FOFOGA FETALAI: Toe lima minute o le sui usufono.

Afioga Hon TAPUNUU NIKO LEE HANG: Lau Afioga, o le mea la lea ua tupu, o le tele o le tapenaga pe ono ea... a o lea faatoa oo i le Page 3. Ia, e le afaina, e usitaia lava ma faaaloalo i lau faatonuga. Afai ua le ausia le auga o le faamoemoe i le lauga, ia o lena e i ina le pule i lau Afioga i le Fofoga Fetalai.

O lau fesili la i lou uso a Minisita ia Olo, o le tatou galuega foi lea i le Cross Island Road po o le a se tulaga ua i ai. E faapena foi le auala lea i le alu atu i Malua e tau i Faleolo, ona o le taua foi o ia galuega tetele, o lea ua uma ona maua mai fesoasoani e faatino ai. A o le popolega i le tuai ona faatino, ona e aoga tele le faagaioi o galuega ia e fesoasoani ai i le tatou konekarate fai auala ia ma fesoasoani ai foi e uunai le tatou tamaoaiga. O le agaga lava lea o le toe tulituli atu i galuega ia, aemaise foi le dam foi lea i luga i Alaoa po o le a se tulaga ua i ai. Ua uma foi ona aumai le fesoasoani i lea foi poloketi aoga, ona o le tulaga lea foi lele i matou afioaga lea e i totonu o Vaimauga 3 i Vaisigano ma Matautu-uta e aafia tele i lologa pe a louloua le tau. A o le faamoemoe o le dam lea, e taofi ai i luga i o le vai aua le faamoemoe o le tatou Pulega o le Suavai aemaise foi le Pulega o le EPC.

Ou te fia fesili atu foi i lau Afioga i le tulaga ua oo i ai le galuega o le auala foi lele faauu atu mai le Loto Samasoni agai i Faatoia. Ua leva ona tapena i lou taimi lea galuega, a o la e matau lava o la ua poloka foi po o le a se mafuaaga. Ae taua le auala lea i le matou afioaga lea, aua femalagaiga ona

ua tele taavale, ae a tele foi auala alo, ia e fesoasoani foi i le poloka o auala i feoaiga o taavale.

Ia, lau Afioga i lou uso a Minisita o le MNRE, lau Afioga Toeolesulusulu, o lea o le a maua le matou \$1 miliona, a o le afaina o le matou itumalo e le lava ni fanua. Mo lou silafia, o le tele o nuu ma afioaga o le matou itumalo e tele ina tu taulaga uma ma e leai ni fanua e galulue i ai, ae po o i ai ni fanua o avanoa a le Malo se i faasoa mai mo le matou itumalo aua le faaaogaina o le \$1 miliona lea ua alofagia ai e le Minisita o Faatoaga le tatou itumalo.

Lau Afioga i le Sui Palemia aemaise a lua Afioga i le Minisita o Vaalele ma Uafu, o le tuualalo a lou lenei sui usufono, se i toe silasila ane a outou Afioga pe le o le taimi talafeagai ea lenei e toe iloilo ai se tou faaiuga e toe aumai se tatou vaalele. E le o toe po malae i le tulaga o le siitia pea i luga o le tau o le suauu ma faapena ona siitia ai pea tau o pasese. Ua uma ona faasalalau mai le Air New Zealand le siitaga 20% ona o le aafiaga i le tau o le suauu ma latou pasese. O le mea moni lau Afioga i le Fofoga Fetalai, e leai se mea tatou te alo i ai, ona e leai se tatou vaalele taou te pule ai ma fuafua ai ni pasese talafeagai mo le mamalu o tatou tagata e fia malaga i Niu Sila ma Ausetalia. O le mea moni o le a dictate mai lava e le Air New Zealand ma le Quantas pasese o vaalele. Ia ma le isi lau Afioga i le Fofoga Fetalai, o Samoa ua siitia lona tulaga mai atunuu e vaivai lona tamaoaiga. O le i ai la o se tatou vaalele, e atagia ai pea le tulaga lelei lea mo Samoa.

Ia na o se toe tuualalo leaga ua faatiga taliga foi lenei vaalele ona e le o maua se iuga lelei ina ia toe aumai le tatou vaalele. E tele le aoga o le vaalele a tatou lava ia, e mafai ona tatou fetuunai pasese, aemaise malaga faapitoa foi ia, ia ma le tulaga la lea o le pule mai lava o Niu Sila i taimi e omai ai latou malaga. Ia o isi malaga e vaeluapo, e faafaigata tele i o tatou tagata aemaise tagata matutua. Ae a i ai lava se tatou vaalele, e fai lava e tatou timetable talafeagai mo tatou lava tagata.

Ona oo mai lea lau Afioga i le mataupu sa laga mai e le Afioga ia Tea Peato, se tasi o tama matua o le Maota.

Tofa Ale Vena Ale: Lau Afioga i le Fofoga Fetalai...

FOFOGA FETALAI: Malie le sui usufono mamalu se i tulai mai lau Tofa i le Igoamatua Ale.

Tofa Ale Vena Ale: Lau Afioga i le Fofoga Fetalai, leai ou te le manatu lava e faalavelave i le lauga a lou uso a sui usufono. Pau o le mea o lea ia manatua na e saunoa e le mafai ona faitau se lauga, a o lea ou te vaai atu o lea e matua faitau lelei lava le lauga. Po o le a la le saoga o lou finagalo e faatautaia ai le tatou Fono, e mafai ona ta uu lata lauga ma faitau lelei lau Afioga? Ia ma le faaalalo tele lava.

FOFOGA FETALAI: Ia, ua faafetai foi mo le laga mai e lau Afioga i le sui usufono mamalu. Ia o tulaga lava na o le tatou Tulafono Tumau. Ua ou manatu foi se ua matua foi si toeaina o Tapunuu, o le ala lea o le faafaigofie o le...

Tofa Ale Vena Ale: Lau Afioga i le Fofoga Fetalai, ia toe faafoi maia lau mataupu faafetai.

FOFOGA FETALAI: Faafetai.

Afioga Hon TAPUNUU NIKO LEE HANG: Lau Afioga i le Fofoga Fetalai, sa ou faapea lava au Ale e au mai ia matou. O le faitau lea e faitau, o mea o details, e le mafai ona ou manatuaina ni details o lau lauga seia vagana ua ou vaai i ai ona faamatala atu loa lea.

FOFOGA FETALAI: Ia, o lea e maua atu lava e le Nofoa ona sa e sii gasegase foi o le faaletonu o ou fofoga.

Afioga Hon TAPUNUU NIKO LEE HANG: Leai, o lea e lelei lava le mafaufau. Ae ou te talitonu ua leai lava ma se isi mea e faauilavea ai Ale faalavelave mai loa, a o lea lava e manaia le folasaga a le sui usufono. O la e foi e silamio mai lava Afioga i Minisita o le Kapeneta aemaise foi le la Itu i le manaia o le lauga. Ia, se i faitau atu pea mea ia e totoe.

Lau Afioga i le Minisita o Uafu, se i toe silasila ane lava i le tatou uafu foi lea i Vaiusu lea sa tapena i le matou taimi. O le taua o lea galuega, o le tele o penefiti e maua e le tatou atunuu mo spinoff, e le gata mo afioaga i totonu o le itumalo, a o ni faamanuiaga i pisinisi ia o taxis, o pasi, o mea faapena, ma le au gaosi meataulima, handicrafts. O le tulaga lena e sau i lalo faamanuiaga ia manuia ai si o tatou atunuu. E na o le toe taatia atu ae pule lava a outou afioga i la outou fuafuaga o taatia ai nei.

Ona oo mai lea i le mataupu lea sa laga e le afioga ia Tea Peato, le sui usufono mamalu mai Faasaleleaga 4, e uiga i tatou femalagaaiga i le va o Upolu ma Tutuila. O lea foi sa saunoa ai le matou Sui Taitai, ona o le faigata tele o le taumafaiga o tatou pemitata tatou te ulufale ai i Tutuila. A e o le fesili lau Afioga, o le faigofie ia ona malaga mai o tatou uso ia mai Tutuila ia tatou, e le tele ni mea e faasa. Ae o le tulaga lea ua i ai tatou, e fai la tatou lipoti mai le Ofisa o Leoleo, lipoti mai le Falemai, tulaga uma faapena ua tele ai galuega, tele tatou tupe ua alu ai. Ae a omai i latou, na o le oso lava i luga o le vaalele ma le passport, sau i inei talia. O le tulaga lena e tatalo atu ai i lau Afioga i le Sui Palemia ma le mamalu o le Kapeneta. A toe fai sa outou feiloaiga ma Malo e lua, toe faamanatu lea o le tulaga lea. E faigofie tele latou, ae matua faigata tele tatou ona tatou malaga atu.

FOFOGA FETALAI: Ia malie le sui usufono, faamaea maia le saunoaga ua maea lou taimi.

Afioga Hon TAPUNUU NIKO LEE HANG: Lea o le a faamaea atu, ui e le i taitai lava uma, ae o nai vaivaiga ia e faatupu manatu ona e le o toe po malae i le aafiaga o le tatou tamaoaiga i lenei vaitau. Na o nai motugaafa ia e aveatu i ina afai e fesoasoani e toe stimulate ai le tatou economic growth, a talia ma faaoga faafetai, ma viia le Atua, ae a leai, toe faafoi mai ni vaivaiga o Tapunuu ia.

Ona faaii lea o sau faamatalaga, e fia faamauina lau agaga faafetai ma lau faamalo i lau Afioga i le Minisita o Faatoaga, lau Afioga Laauliolemalietoa, po o lau tofa foi i le matua, lau tofa Iuli, faafetai tele. O le tele ia o lenei luitau na e taumafai e faatino, o lea ua tino, o lea ua i totonu o le tatou Tala o le Tupe, o lea o le a faagaoioi ai galuega a itumalo. E maumau pe ana \$2 miliona le fesoasoani, ia ae amata ia i lea miliona, aua e tausaga fou foi toe sau le isi miliona. Ae momoli le faafetai ma le faamalo i lau Afioga mo lenei fuafuaga mamao, o le a faamanuiaina ai itumalo taitasi e 51. Ae pei ona ou fai atu, o lea na e saunoa mai, e toe maua foi le isi miliona i le tausaga fou faafetai. Ae pei lava o le tulaga lea e aumai le miliona, a fua atu i le toatele o le matou afioaga, toetititi lava atoa le numera. Ae faafetai o lea o le a sauni e toe talia le isi miliona.

Lau afioga o nai manaoga ia ma ni fautauga foi...

Susuga Hon Lauli Leuatea Polataivao Fosi: Lau Afioga i le Fofoga Fetalai, ona o le faasaoina lava o a tatou faamaumauga, ae ua ta fefe i le mea lea i le tuuai soo o au i faamaumauga a le Palemene. O le agaga lava ia o le Faigamalo e pei ona tatou talanoa i le amataga, e tasi le tausaga e \$1 miliona, 5 tausaga o le nofoaiga, e \$5 miliona. Na ala ona le atoa le tatou miliona muamua, ona o tatou finauga ia na fai, lea na pasia ai le Tala o le Tupe ua leai se taimi e faigaoioi ai. O lea ua ala ai ona \$200,000 le tupe lea ua alu i le taimi lenei. Ae o le miliona lava ia, e taunuu lava. Ae faafetai Tapunuu, o lea ua taatia i le ogatotonu o le Maota lenei, le taeao lenei lau saunoaga. E le o ni mea la na ona folafola, o lea ua faataunuu le tatou faamoemoe, ia viia le Alii. Omai laia, welcome to the party, welcome to our party, omai laia tatou talanoa faasoa aua le manuia o lo tatou atunuu. Ae faafetai...ua ou tulai atu e leai se miliona faaopoopo seivagana ua finagalo le Faigamalo e faaopoopo se isi miliona. Ae tatou tatalo i le Alii, ia manuia le tai miliona muamua, aua a manuia, o le a le mea e tuu ai, O le a le mea e tuu ai pe a faapea e manuia, ae fua atu i ina, o le success o le poloketi lenei, o tatou. O le manuia o le poloketi lenei o sui usufono o le Maota, ia e lagolago le poloketi lenei. Ae afai e sau le sui usufono e le lagolago, e tetee, o i ina lea tatou te finau ai. Ae viia le Alii, ua ou vaai atu o lea lava ua fusi le fau o Malo. Ia afifio mai laia e fai faatasi a tatou atinae.

FOFOGA FETALAI: Ia malo faafetai o lea ua faamalamalama e lau Afioga i le Minisita. Se i tulai mai, e te agai i....

Tofa Ale Vena Ale: Lau Afioga ma le faaaloalo tele lava, leai o le saunoaga lea a le Afioga i le Minisita, lea e faapea seiloga e finagalo le Faigamalo e toe maua le isi miliona. E leai e le o le mea lena e tataua ona i ai, e tataua ona miliona, miliona, miliona. Ioe, o le mea lena o lea na folafola, aua foi o le mea lea o folafolaga e pei o le mea o le a u, you have to do it otherwise se e toe foi mai le a u ia oe. Ia manuia le fonu.

Susuga Hon Laauli Leuatea Polataivao Fosi: E pei lava e sese le oti lea e te tagi ai. O lea ou te faamalamalama atu i le saunoaga a le Afioga ia Tapunuu, e lea e i ai miliona i tausaga uma. Ua uma ona pasi le tatou mea lena, I mean every year. A o le faaupuga lea faapea e \$2 miliona, ou te le i fai atu e \$2 miliona. Ia tatou agai muamua se i tali lea mea ua aumai, e miliona i tausaga uma, fa tausaga lea e totoe.

FOFOGA FETALAI: Malo faafetai, ou te iloa ua manino lea vaega. Faauma maia le saunoaga ua maea lou taimi.

Afioga Hon TAPUNUU NIKO LEE HANG: Lau Afioga ua leva ona tau faauma atu lau lauga, ae o le faalavelave mai o faauilavea ia. E pei ona ou faamatalaina atu, e momoli lau faafetai ma lau faamalo i le Minisita le Afioga ia Laauliolemalietoa po o le tofa foi i le matua lau tofa Iuli. Ua faafetai, na ala ona faailoa atu le isi miliona lea, e mafai la ona advance mai le isi miliona, leaga ua tele a matou fuafuaga, ae ua le lava le miliona lea. Ae taatia ia se i aulia le tausaga fou.

E pei o le tulaga lena, ae faafetai tele atu i le Afioga i le Minista o Tupe ma le Matagaluega i le tapenaina o le tatou Tala Faatatau Autu o le Tupe 2022/2023, e faapea foi ma le Tala Faaopopo o le Tupe 2021/2022. E momoli atu ai le faafetai ma le faamalo, e le faigofie le galuega ua e tulai mai ai, ae o le measili o lea ou te faalogo atu, e te faatuatua i le Atua. Ia tumau lou faatuatua, aua e na o le pau lena o le tagata e fesoasoani mai ia oe. E le mafai ona fesoasoani atu ia Laauli po o se isi Minisita i lau galuega. E fai lava oe ma lou faamoemoe i le Atua e fesoasoani mai, e faasino mai e le Atua ia tulaga uma i le faafoeina o lou valaauina. Ae aua e te faamoemoe i Minisita na e... aemaise lava le Afioga ia Laauli. Ia fai lava lau galuega i lou talitonuga, e talitonu i le Atua, o lea foi ua talitonu Laauli ma faatuatua i le Atua.

A o lau tatalo ia outou afioga i Minisita, se taofi ia mea, o le tou o i facebook ma faaleaga mai matou. Ua ou tatalo foi i le matou vaega, taofi ia mea, o lea ua tatou agai i luma, faalelei lo tatou Malo. A o lau tatalo lena, ina ia tatou savali agai i luma, soalaupule lelei mataupu e fesoasoani i le atinaeina o le

tatou atunuu aemaise o le tou Faigamalo. O le lagolago foi a le matou Vaega, e ui o le vaega e le tetee ae Vaega Agai, o le agaga lava lena, e matou te le tetee foi ia outou fuafuaga, o matou e matua tatala atu lava ia manuia fuafuaga, aua o le tatou Malo.

O sau tuualalo lena, aemaise lau Afioga Laauli, soia ia e te soona faia matou sui usufono, i au saunoaga e te alu ai i luga o le TV ma e...

FOFOGA FETALAI: Ia malie le sui usufono mamalu ua maea lou taimi.

Afioga Hon TAPUNUU NIKO LEE HANG: E na o se tuualalo, o lena e i ai le faimea ma le amio pulea e taofi ai nei mea. O lea foi na lauga isi sui usufono, soia tatou te faia ia mea, o tatou o uso, tatou te galulue faatasi...

FOFOGA FETALAI: Vaai la o lea ua tulai mai Laauli...

Susuga Hon Laauli Leuatea Polataivao Fosi: Malie ia Tapunuu, malie ia lou finagalo, se e ala lava ona ou taumafai atu o le talitali atu. Ia saunoa ane i le Sui Taitai e saunoa i le tou Taitai, e faauma moi loa nei mea, ona matou malolo loa lea. Aua e le mafai ona matou malolo, e faifai mai lava. O le Malo o lea e tali, o le Malo lea e taumafai e talitali atu, leaga e le tuutalaloa upu ia e alu. O le la e tapuai le atunuu, ua atili ai le le malamalama o le atunuu. Ae afai o lou finagalo lea, se o ula na o faigamea.

FOFOGA FETALAI: E talitonu ua maea lea tulaga, e avatu foi le fautuaga i lau Afioga i le sui usufono mamalu, ua maea lou taimi, a o ia tulaga o mea na e lafo atu lava ia outou le aumatutua, le aufueloloa o le Maota, ia tautuana fautuaga ua aumai. E i ai le manatu, malo saunoa i lau Afioga i le Sui Usufono mamalu.

Afioga Hon TAPUNUU NIKO LEE HANG: O le a faauma atu lau Afioga faamolemole. E momoli lau faafetai ma lau faamalo i lau Afioga, faamanuia le Atua i lou valaauina aua le faatonutonuina o le tatou Palemene, ona o lau matau, e le o ffilemu ia sui usufono o lenei Palemene, ua oo mai le taimi, a o le tulaga lea ua i ai, faafetai lava. Ia faamanuia le Atua i lau galuega i le faafoega o le tatou Fonotaga, ae ola uma matou i le alofa ma le agalelei o le tatou Tapaau. E faamalo i le Afioga ia Olo, aemaise lou uso ia Laauli, tatou galulue faatasi, faamagalo alofa. O le lauga lena a Iesu, alofa le isi i le isi, faamagalo le isi, aua a le faia le mea lena, e le faamanuia le Atua ia outou ma matou. Ia manuia le Fonotaga.

FOFOGA FETALAI: Ia malo saunoa, faafetai faasoa ma fesoasoani. O le agaga lava lena o le tatou Alii, ia tatou maua le alofa, maua le fealofani, maua le filemu ona manuia lea o le atunuu. Ua malo le saunoa faafetai foi

faamanatu. O tiute lava na o tatou o Taitai o le atunuu, ia tatou maua le filemu ma tatou galulue faatasi, maua ai le manuia o le atunuu ma le filemu o le Maota. Ua i ai le manatu lau Afioga i le Sui Taitai o lou avanoa lenei, lau Afioga i le sui usufono mamalu mai Anoamaa 2 lau Tofa Lauofo.

Tofa Hon LAUOFO FONOTOE NUAFESILI PIERRE LAUOFO: Ia faafetai i lau Afioga i le Fofoga Fetalai ua maua se avanoa, e taumafai atu ai foi se manatu o lenei itumalo. Ia eetai pea ia lau Afioga, faamalo le faapapale i le faatonutonu folauina o le Fonousu a lo tatou atunuu, e tau mai i lenei itula o le aso. E faapea foi le afio o le Sui Palemia ma le Aiga Kapeneta, afifio foi Afioga i Minisita Lagolago. O lea foi e eetai atu le paia maualuga o sui usufono mamalu o lenei Itu o le Malu.

Ua faamalo foi le galulue i Ofisa Sili o Pulega o Matagaluega, i le latou foi galuga faifaipea aua le tautuaina o le atunuu.

Ia, le tapuaiga a Samoa i ona tulaga faalupea, i ou paia o ou mamalu o ou sa ma ou faiga, e manatu o le a faataalolo aua o Samoa o le atunuu tofi, ua maea ona tofi, tofa. Ua faapena foi ona taoto a i fata ae ae i lumafale. Ua malo le tapuai, malo le folau.

E faamalo foi i le aufaitatalo i le itupa paia ma le latou foi fatuaiga tausii, ma le latou galuega faifaisoo o le tatalo e nonomanu aua se manuia o Samoa auiluma. E faafetai le tatalo faafetai le tapuai.

Lau Afioga i le Fofoga Fetalai, sa nofonofo lava ma faalogologo totoa i lenei tolu o aso ua tuanai, e tusa ai foi ma saunoaga matagofie a sui usufono mamalu a le Maota. E tele mataupu taua na afea ma laga i saunoaga, o mataupu lava sa manatu e oo i ai se lagona, ae peitai ua lava ma totoe ia finagalo matagofie, ua faapena ona poupu ai ma saili ai se finagalo o le Malo, aua le Tala Faatatau Autu o le Tupe i lenei foi tausaga o lumanai.

Ae e i ai nai vaega laiti ia, e tatau ona ave i ai se faamamafa. O le tulaga i Faiga Faavae ma nai vaega o seleni laiti. E pei lava foi ona ou talanoa i le Tala Faatatau Autu o le Tupe i lena tausaga ua tuanai atu, e faapea foi Tala Faaopopo o le Tupe ua mavae atu nei, i le amataga o lenei foi tausaga. O lo o taoto pea le tatou tamaoiga i se tulaga maaleale, lea e pei ona malie ma afea foi i le tele o saunoaga i afioga i sui usufono mamalu. O le tulaga e pei ona i ai le tolu tausaga sosoo ua tuanai atu. E le natia mafuaaga, o lea lava ua silafia, tolu tausaga ua mavae atu, na tatou amata mai lava i le misela. Na sosoo mai ai ma le vaitau, o le louloua o le tau, e tele aseta sa tau faaleleia o le tatou Malo, e faapea foi aseta a tagata taitoatasi lava ia. E faapena ona sosoo mai ai ma le Koviti-19 seia oo mai i le aso o lo o faapena ona feagai ma i tatou le faafitauli tele, e pei foi ona feagai ma le lalolagi i tulaga ia e pei ona i ai ia ma suiga o le tau.

Ae e le natia foi i le vaavaai atu i tulaga o aafiaga ogaoga mafua mai i tulaga e pei ona ou taua. O le siitia maualuga o le tau o le soifuaga. E malie foi i saunoaga a le tele o sui usufono mamalu, o lea lava e pei ona o tatou

matauina i lenei vaiatau. Le taugata le tau o oloa e le gata o oloa taumafa ae faapea foi mo oloa faufale. Ia o vaega ia e faapea ona mataitu e faafetai atu foi i le Matagaluega o Tupe ma le Minisita i le mataituina o ia tulaga.

O lea foi e pei ona faamauina ma afea i nisi o saunoaga, ia ua leai se tupe maua mai i tatou tagata tafafao maimoa mai i Samoa. Ia ae o lea foi e aafia uma ai lava ia le Pasefika ma isi foi atunuu o le lalolagi. Pau mai lava i le \$500 miliona sa i ai i le tausaga, pau lava i le taimi nei i le leai o se tupe. Ia ae manatua foi o le tatou atinae lea sa faapena ona uunaia malosi e le tatou faigamalo talu ai ia ona o le manuia foi lea e faasafua atu maua mai i tagata tafafao maimoa mai ia ona faapena lea ona manuia ai tagata lautele. E le gata mo tagata fai taavale laupasese, o faleoloa o faleaiga, faletalimalo ia ma isi uma ituaiga pisinisi, ia ae faapea foi latou e gaosi ia meataulima mo le faatauina atu mo tagata tafafao maimoa mai.

O lea foi ou te matau e pei foi ona saunoa ia le afioga a Tapunuu ia, pei ua fai sina telegese o atinae tetele ia sa fuafua mai e faataunuu. O le tatou auala lea o le Cross Island Road, faafetai. O lea ou te matau atu e pei e foliga mai o lea e i totonu o le lisi mo tupe foi ia mai i fafo, o fesoasoani ia o le vaega tele lea e i ai mo le faamoemoe lea, o le upgrade o le auala lea ou te vaai atu e \$7 miliona ma sene lea e i ai i totonu i i.

Ia ae faapea foi ia le tulaga o le tatou faatanoa tele lea e i Alaoa. O lea foi ou te matau atu lea e i ai ia le faaunegatupe lea mai i le Faletupe o Atinae o Asia \$1.3 miliona, e pei e tauala mai i le EPC mo le faamoemoe lea i tapenapenaga o le faataunuuga o le galuega lea mo le tatou atinae tele lea.

E faafetai i le Matagaluega, faapea foi se silasila a lau afioga i le Minisita o lea e foliga mai o lo o pulea lelei lava tulaga o tatou seleni, e ui lava ina faaletonu le tulaga o le pau maualalo o le tamaoaiga, ia ae o lo o pulea lelei ia le tulaga o tatou aitalafu, togitogiina o tatou aitalafu ia faapea foi tulaga o isi tupe maua i le aoao mai o tupe maua ia seivagana ai nai vaega ia...

E pei ona matauina foi i saunoaga ma faafofoga i saunoaga a isi sui usufono ia o lo o tulai mai ia le tatou aitalafu i lalo o le 50% masalo po o le 48% o le tatou GDP. Ia o lea lava e i le vaega manageable ia levels ia e i ai ia tatou vaega ia e faapea foi ia tatou Debt Service, togitogiina o tatou aitalafu. Ia faapea foi ia tulaga o pasene o lo o i ai pe a fua i le GDP.

O le matau atu ma le vaavaai atu i le kalafi lea e aumai i le saunoaga a le afioga i le Minisita o Tupe e tusa ai ma le Tala o le Tupe, e pei foi ona faamauina i totonu o lenei kalafi. Saunoa foi i ai nisi o sui usufono tatou vaega le o le deficit, ia o lea ua aumai lava e toese mai ia tatou Tupe Faaalu i Tupe Maua, ia ona taoto mai lea o le Faasiliga o Tupe Alu i Tupe Maua i le \$174+ miliona.

O se tulaga ua maualuga foi ia le tatou deficit e pei ona i ai. Ia a toese ai la ma isi tupe ia e aumai mai i fafo i faaunegatupe ia faapea foi ia fesoasoani tuusao po le Budget Support, ia ona taoto mai lea o se vaegatupe e \$89 miliona e tusa la o le tatou short fall lea i le matau atu i ai. O le short fall lea

ua sili ai ia tatou Tupe Faaalu na i lo Tupe Maua. Ia e pei ona ou taua ia le faaunegatupe lea e pei o lau vaai atu, o le tupe lea e agai mai i i le EPC mo le faamoemoe lea mo le faatanoa i Alaoa \$1.3 miliona.

Ia lau afioga i le Fofoga Fetalai e pei e matau atu foi i le tupe lea o lea ua fuafua e maua mai Tupe Maua masani \$643 miliona e pei ona saunoa foi i ai se tasi o sui usufono anapo. Ia e pei e tau vaavaai atu e le faigofie foi ona ausia ia lea vaega seleni aua o tupe ia o lo o fuafua e aoina mai. E ala la ona avatu se manatu e le faigofie ma e faigata ona o luitau ia o lo o feagai ma tatou i le taimi nei. E pei la o le tulaga i a tatou tagata tafafao mai e leai se tupe. E leai se tupe e maua mai.

O lo o i ai fuafuaga faafetai i le faigamalo, faamalo o lea ua maua atu e pei o le masina o Aokuso lea o le a toe tatala ai ia feoaiga ma toe tuu saoloto ai feoaiga a vaalele, ia o le faamoemoe lena ina ia maua foi nisi o tatou turisi ma tagata tafafao maimoa mai e fesoasoani i le tatou atinae lea. Ia ae pei lava i so o se mea faatoa amata, ia atonu e le faapea e amata loa ona lolofi mai lea o tagata. Ia e masalo e i ai sina taimi e toe tau build up mai ai ia le tatou Tourism. A o se agaga faafetai lea pe afai o le tulaga ma le fuafuaga lea, o le a toe tatala ia tatou borders mo le faamoemoe lea.

Ia ae e le tuua ai lava ia tulaga e pei ona silafia, ia tulaga tau soifua maloloina e tatau ona mataitu lelei, ia mo mea o faamai e ono ulufale mai i totonu o le tatou atunuu e aafia ai ia tatou tagata. Ia ua faapena foi ona faalogologo atu foi i isi saunoaga i mo mea i isi variants fou o o le Koviti ia e tatou te le ma iloa na mea e tatou te ma iloa pe o le a tulaga e i ai. E i ai foi nisi fuafuaga afai e oo mai, ia pe toe tulai mai nisi lockdowns ia ma isi mea, ia e ono aafia ai nisi tulaga o le tatou tupe e aoina mai ma Tupe Maua ia ma soona aafia ai lava ma le tatou tamaoaiga, ae ma o lea foi e pei e maua atu e faapea o se taimi e lata mai po o lea masina e taofia ia o tatou tagata foi ia e galulue faavaitaimi.

Ia tasi lea aafiaga aua a taofia tagata ia, ia o lona uiga ua pau foi i lalo ia le tatou remittance, pau foi i lalo ia tupe ia mai i fafo i ni outou alo ma ni matou fanau o lo o galulue i atunuu mamao, ia faapena ona lafo mai seleni ia aua le tausiga o aiga i nei i Samoa nei. Ia aua o faiga lava ia ma uiga ia o tatou o Samoa, po o fea lava o le lalolagi e i ai, e susue lava le faamalama ma autilo. E le galo ia le faasinomaga, e le galo ia aiga o lo o faamuli atu i Samoa nei.

O lea foi la ua tilotilo atu, ia ua pau i le Tausaga Faaletupe i le agai nei i luma, o le a pau ia tupe foi ia faameaalofa ia po o grants. O le Tausaga Faaletupe na tuanai atu nei o lea e vaai atu e \$260 miliona, tausaga lea o le a agai atu i luma, pau le \$30 miliona, o le a pau i lalo o le \$230 miliona. Ia tasi ia seleni o le a faapena ona le maua mai e fesoasoani ai i a tatou atinae.

Ia faapea foi e i ai isi tulaga o polokalame o lo o faaauau pea ia ma tele ai foi ia tatou foi galuega, ia o le faafitauli lava lea o faafeagai foi ma le lalolagi o le suiga o le tau. E tele foi ia mau faafitauli o feagai ma tatou ae tasi lea luitau. A o le vaega lava lea i le tupe, ia lau afioga i le Minisita, o lea ou te

matau atu i le vaegatupe foi lea e totogi ai ia tatou aitalafu, o le Tausaga Faaletupe lea na tea atu nei, e \$72 miliona le tupe lea sa alu e togitogi ai aitalafu, ae lea ua matau atu, o le Tausaga Faaletupe lea o le a agai atu i luma, o le a siitia i le \$104 miliona. E fesili ai lau afioga, po o le a se fua a le tatou Malo lau afioga ma le Matagaluega? O le a se fua ia tuuitiitia ai, ia tupe alu mo le togitogiina o ia aitalafu. O le a se silasila i ai a lau afioga ma le tatou Matagaluega?

Ia e pei o tulaga ia o tulaga lautele ia o Faiga Faavae lau afioga sa fia oo i ai se leo ona o tulaga maaleale lava o le tatou tamaoaiga o lo o i ai i lenei foi vaiatau. Ia ae tatou saili fofo aua e le faapea a oo mai faafitauli ona tatou nofonofu lea. E tatou te tilotilo foi i luitau o feagai ma tatou i lenei foi vaiatau, ia faapena ona tatou vaavaai po o a ni fofo talafeagai.

Siitia o le tiute ma le lafoga o oloa, oloa ia e pei ona aumai i le saunoaga a le afioga i le Minisita, o oloa ia foi ia o lo o faatupulaia ai ma tupu ai faamai le pipisi po o NCDs. Ia aua o le siitaga lea, o se taimi muamua faataunuu ona aumai lea o se Tulafono i le Maota e pasia ai ia le siitaga lea. Ia o se Teuteuga o le Tulafono o Tiute, ae o le vaega lea se i silasila ane lau afioga ia faapea foi ia le tatou faigamalo aua o oloa ia e i ai le pia ma le tapaa faaitaiga o le tapaa. Siitia i luga le tau ma le taugata o le tapaa, ia ona faapena laia ona silasila tagata i le isi ituaiga tapaa.

O le mea lena e matau i lenei vaiatau, e tele i latou ua faaoga le tapaa Samoa. Ia aua o lea e mafua ona ou talanoa atu i le vaega lea, ona o lea e aumai o le faamoemoe o le siitaga lea, o tupe e aumai e ave e faagaioi ai polokalame, ina ia tuuitiitia ai ia faamai le pipisi. Ia o le tulaga na e i ai. O le tele la o isi tagata ia e pei ona matau atu, a sii le tapaa foi lea mai i fafo, ia ua see i le tapaa Samoa. Ia ae o le tapaa Samoa e leai se lafoga e totogi ai. O le isi mea, e le faapea e taofia ai la le faamai aua e pei lava o le faamai lea o le Kanesa lea e pei ona tutupu mai i le mea lea o le taumafa tapaa.

Ia e faapena foi ia le pua po o le ava malosi. O le mea foi lea e tulai mai i mea ia pe a tepa i isi foi vaiataimi ua tuanai, a sii atu le tau o le pia lea e gaosi i le falepia, ia a ua o foi isi toe gaosi ia le pulu. Ia toe taumafa le pulu ma faapena ona tele ai faafitauli feagai ma afioaga ma nuu i tua, ia faapea foi i afioaga uma o le atunuu, pe a o foi gaosi tulaga faapena.

O lona uiga e foliga mai i le mea lea e tau vaavaai atu i ai, afai ae sii tele i luga ia lafoga o oloa nei, ia o lona uiga ua pau foi la i lalo ia le faaogaina o oloa ia, ua pau foi la i lalo ia oloa ia i le aumaiga i totonu o le atunuu, ia o lona uiga ua aafia foi ma tatou lafoga ia e ao, aafia foi la ma tatou Tupe Maua i le uafu po o le port of entry. Ia se i silasila ane, silasila ane i vaega na, e pei o mafuaaga ia e mafua ai ona ou talanoa atu, e aafia ai ia le aofaiga o le Tupe Maua lea ma tupe e aoina mai, ia ona aafia foi lea o le faatinoina o tatou fuafuaga.

E pei o vaega ia o le NCDs, ia e pei ona ou talanoa atu, o le vaega lea e le tatau lava ona tuua ia polokalame faalauiloa, polokalame faalauiloa i mo

aafiaga tuga ma aafiaga leaga o mo mea o taumafa po o ituaiga oloa nei i le tagata soifua. Faamalositino, polokalame faamalositino, o mea na e tataua ona uunaia. A o le vaega lea o le siitia i luga o le Sales Tax po o le Tax lea o le Excise Tax i i i le uafu, e manatua foi, o tupe ia e ao e le Matagaluega lea o le Tiute ma Lafoga, e ave agai i le Matagaluega Tupe, ia ona faasoosoa mai lea i ina. Aua e le faapea e ao mai tupe na ona ave sao loa lea i le Matagaluega o le Soifua Maloloina e faatino ai ia polokalame nei. O lona uiga, e fuafua e le Ofisa o Tupe ia le tupe e faamatuu atu e faatino ai polokalame ua uma ona faataoto e le Matagaluega o le Soifua Maloloina mo le foia o nei foi ituaiga faamai.

Ia o lea foi e matau atu i tulaga o tatou tupe maua mai i lafoga a tagata faigaluega PAYE, tupe foi lea lafoga e tipi mai i totogi, o lea e matau atu e tutusa lelei lava le tupe lea na fuafua e aoina mai i le Tausaga Faaletupe lea na tea nei, ma le tupe lea foi e fuafua, e aoina mai i totogi o tagata faigaluega i le Tausaga Faaletupe lea e lumanai nei. O lona uiga, e foliga mai ia au, e leai ni galuega faaopopo ia po o ni galuega foi o le a faapena ona le toe maua. O le a leai ni additional jobs i tulaga tau employment ia e foliga mai foi e leai ni job losses. Ia aua o lea e tutusa lelei lava tupe ia na aoina i le isi tausaga ma tupe o le a aoina i le isi tausaga lea e lumanai.

Ia e pei ona ou fai atu o tulaga ia o le NCD, ia atonu o se aso o lumanai ona faataoto mai lea o le Tulafono e toe sii ai ia lafoga i oloa ia. Ma o le upu moni lava, na fai muamua foi le lafoga lea masalo po o le 6 tausaga talu ai, e aumai ai foi le Tulafono faapea i totonu o le Maota lenei e pasia ai e pei lava e 8% ia le siitaga lea sa aumai. Ae e tele lava mo mea o taumafa foi ia e suamalie. O lea sa aumai ai ma isi taumafa ia tuuaisea e i ai ia mo siusiu pipi.

E faigata tele le tulaga lea e matau i le NCD, aua ua tele ia tatou taumafaiga e fai, ae o lea e alu lava i luga ia le NCD. E manatua foi e le i leva tele atu foi ona taofi le siusiu pipi e faaulufale mai i le atunuu. E tasi lea mafuaaga na taofia ai. E taofi ia le siusiu pipi, ao la e alu lava i luga ia le NCD. O lea ua toe tatala ia le siusiu pipi ma isi mau oloa, o lea e alu lava i luga ia le NCD. Ia se i silasila ane ia le tatou Matagaluega o le Soifua Maloloina ma le Minisita o le Soifua Maloloina, ia ni isi faiga e taumafai e toe tuutiitia ai, aua e pei lava ona ou talanoa atu, o le sii lava ia na o le tax, e le o le fofo lea. E le o le fofo lea o le mataupu lea. Ia aua e i ai lava uiga foi ia o tatou, ia e pei la o le faataitaiga o le fasipovi masima lea ua aveia ma se tasi mataia i o le atunuu. E tiga ona iloa e mai suka pe toto maualuga, a fia tausami lava, e ai lava. E pei e faapena uiga. Ae o le uiga lena o le tala, aua le pa le fautua ma le faatino o polokalame faalauiloa o aoaoga. Ia faataunuu pea ma faaauau pea ia tulaga ia, e pei e faapena sou manatu.

O le tatou Export Authority, ia e na ona fesili atu po o le a se tulaga ua i ai ia le tatou Export Authority? ona o lea foi sa i ai ia vaega o seleni sa faaagaga i le isi Tala o le Tupe ua tuana'i atu mo le faatinoga o le faamoemoe lea. Ia

ae o lea e foliga mai e le o taunuu i se taunuuga ua amata ona faagaioi i le tulaga e tatau ona i ai.

Ua afea foi i saunoaga ia tulaga o Turisi i le tulaga lea i tupe ua tuutiitia e ave i le Turisi, ia o lea ua leai se tupe e mo le faalauiloaina o Turisi i lalo o le Tala o le Tupe. Ua fa foi polokalame faalauiloa a le Turisi, ua leai foi se tupe o i ai. Ua aveese mo le Tausaga Faaletupe lea e agai atu i luma. Ia o le tulaga lena o lea ou te tilotilo atu i ai, ua leai foi se tupe e faatupe ai ia le Teuila Festival. O lona uiga la e pei e foliga mai e leai se Teuila Festival. Ua uma, ia o le tulaga lena, e pei e ala la ona avatu, o le fesili. O le fesili lena e avatu e aumai se faamalamalama...

FOFOGA FETALAI: Toe lima minute o le sui usufono...

Tofa Hon LAUOFO FONOTOE NUFESILI PIERRE LAUOFO: A le tatou Minisita ma le faigamalo i le agai i luma.

E au ai foi lou manatu i le tatou vaalele. Ou te le toe agai tele o lea ua maea ona saunoa nisi o sui usufono i le tulaga o le tatou vaalele. E pau lava o lea o lea ou te vaai atu i le \$6 miliona lea e ave mo le vaalele. Ia e pei e foliga mai, o le \$6 miliona lea, se i tau fai ai ia feutagaiga ia e fai nei i le tatou vaalele lea e toe faafoi. Ia, masalo ana faapea e faataunuu lava le aumai o le tatou vaalele ia e le alu se \$6 miliona lea e tau fai ai lena tulaga. Ia ae o lea foi la ou te matau atu, e pei lava o lea ua maua i le faalogo, e pei lava ua faamalolo ea ia le Taitaifono ma sui o le Komiti Faatonu o le Samoa Air. Ou te le iloa i ai, ae e pei o le tulaga na po o fea ua agai i ai ia le tatou Kamupani vaalele lea, ae o na ua avatu ia fautuaga.

School Connectivity, ona o lea sa fesili ai se tasi o sui usufono mai Safata i le tulaga lea i le polokalame lea i le \$2 miliona ma le isi \$600,000 faaopoopo po o le a tulaga o le Tender Process lea e faatino ai? ona o lea foi e matau atu, e pei e foliga mai o le Kamupani lea ua faamanuiaina i lea foi faamoemoe ma le atinae a le Malo, ia o lea e pei e matau atu o lea ua ave i ai le poloaiga a le Pule Faatonu po o le Regulator, e aumai ia latou Finacial Statements se i silasila i ai. Ia se taimi se i e saunoa faamalamalama lau afioga i le Minisita po o le a le mea ua tulai i tulaga faapea.

O le vaega lea o le tatou Matagaluega o Aoga, faamalo faafetai i lau afioga i le Minisita, o la foi e nofonofo ma matau ma faalogologo atu foi i le galuega ma le tatou Matagaluega. O lea ua ou vaai atu ua toese uma ua aveese uma lava tupe ia tau taaloga. Ua leai se tupe mo le lakapi, ua leai se tupe mo le Paralympics, ua leai se tupe mo meataalo, ua leai se tupe mo le Netball, ua leai uma lava ni tupe i lau vaai atu i le Tala o le Tupe.

Ia a o le isi vaega tele lea o lau Matagaluega, o taaloga, sports. Ia atonu ou te le iloa po o i ai se vaegatupe i se isi mea e faatino ai ia vaega, ia ae e pei e faapena se lagona o lou lava talitonuga, e tatau lava ona faaauau ia tatou taaloga a alo ma fanau laiti. O lea foi ua tele lava le lumanai lea ua maua i

taaloga aemaise lava pe a maua avanoa e taaalo ai i atunuu i fafo faapolofesa. O le tasi lea tupe lea ua maua, faafetai ai foi i le tulaga o le tatou taitoa 7 lea sa afea i se saunoaga a se tasi o sui usufono i le tulaga siitia foi ua i ai i lenei vaitau, ia e faamalo foi le taaalo i alo ma fanau a lo tatou atunuu o lo o tauavea le fua i ia foi taaloga faava-o-malo.

O lea foi ua ou vaai atu ua leai se tupe o malaetaalo, ua leai foi se tupe e fausia ai malaetaalo ia pe faaleleia ai ia malaetaalo. Ia tasi na vaega.

O lea ua sii mai le seleni lea i lalo o le Ofisa o le Tupe i lalo o le Ofisa o le Palemia \$1 miliona e faaagaga mo le sisigafua o le tausaga fou \$1 miliona. Ia e pei o le tulaga lea i se saunoaga faamalamalama i le faaaogaina o le seleni lea i le sisiina o le fua o lea o le a faaalu ai ia le \$1 miliona. Ia o lea foi ua taoto ia saunoaga ma faaaliga a le faigamalo, e tausaga atoa le fua. Ia e pei o le mafuaaga lena o le afea o lea vaega i lau talanoa \$1 miliona po o fea le mea e faagasolo agai i ai? atonu o isi vaega uma ia, ia le Taitaifono o le Komiti o Tupu o le a gafa ma le tali o isi uma tulaga faapea.

O le tatou Police Academy, o se mataupu lenei ma se atinae ua leva ona taumafai mai. O lea la e vaai atu faafetai o lea e i ai nai seleni ia o lo o faaagaga mo le faamoemoe lava lea.

Afioga Faleomavaega Titimaea Tafua: Lau afioga i le Fofoga Fetalai...

FOFOGA FETALAI: Tuu atu le avanoa i le afioga i le Taitaifono o le Komiti o Tupe...

Afioga Faleomavaega Titimaea Tafua: Faafetai mo le avanoa i lau afioga i le Fofoga Fetalai. Sa nofonofo lava e usitaia lau faatonuga ae peitai ane, e lelei ona... mo le silafia e lau afioga i le Sui Taitai o le Itu Agai, o lo o i ai lava le tatou \$2 miliona lea i mea tau taaloga, faletaalo ma... masalo ne i te i ua misi.. o lena o le a musumusu atu ia le afioga Tapunuu i le vaega lea ma le agaga faaaloalo.

FOFOGA FETALAI: Ia, o lena ua faamanino mai e le Taitaifono, ai ua misi i lau silasila ae o lena lava e i totonu o le Tala o le Tupe. Ia faauma maia lau saunoaga ua uma lou taimi.

Tofa Hon LAUOFO FONOTOE NUA FESILI PIERRE LAUOFO: Faafetai, ia e pei o le vaega tonu lea ou te talanoa atu ai lau afioga i le Taitaifono, o lalo o le Budget a le MESC ona o le Education ma le Sports. O la e lisi uma ai lava mea ia ou te tau atua, sa i ai vaegatupe i le Tausaga Faaletupe lea na tea nei, ae o le agai atu i luma, ua leai uma lava ni tupe. O le mafuaaga lena o lau fesili. O lea la ua e tali malamalama, e i ai le isi itu lea e i ai le \$2 miliona lea, ia atonu o le a e saunoa i se taimi, e

faamalamalama, po o le a la le faaaogaina o le \$2 miliona ma le vaevaeina o lena foi \$2 miliona. Ae malo faafetai foi i le saunoaga a lau afioga.

Ua uma ona ou talanoa atu i le tatou auala lea e agai atu i Tanugamanono agai atu i tua i Siumu. O lea ua i ai ia le vaega seleni o lea ua i ai ia le vaega seleni lea ae faafetai atu mo le atinae lea. Aua o atinae ia sa ou lauga muamua ai aua e manaomia e lo tatou atunuu. O galuega tetele ma atinae tetele nei, ia aua o le tele o isi Kamupani ia, o lea ua matau atu e leai ia ni latou galuega o toe faia. Pe tasi pe lua nai Kamupani o lo o galulue i le auala lea e agai i Faleolo, ia ae ou te iloa o le tele o isi Kamupani ua faaleai se galuega o i ai.

O lea foi la ua ou vaai atu e pei ona saunoa se tasi o sui usufono ananafi pe o anapo foi, ua leai foi seleni lea sa faaagaga mo polokalame foi ia e foia ai ia le sauaina o tina. O lea foi la ua ou tilotilo atu ua leai se tupe, ia o se taimi saunoa faamalamalama po o le a se faamoemoe, ae o le a se fuafuaga a le faigamalo i lea tulaga.

Ua leai foi se tupe e tuuitiitia a ia ia NCDs. Ia masalo la ai o faamoemoe i le tatou Tax lea o le a sii nei. Ao tupe ia sa i lalo sa faaagaga mo polokalame ia, o lea ua ou vaai atu mo le Tausaga Faaletupe o agai i luma, ua leai uma ni vaegatupe o i ai.

O le vaega lea o tatou fono ia, fono Faava-o-malo, fono tetele ia sa fuafua mai. E i ai le Fono lea o Taitai o Atunuu o Malo o le Taupulega Peretania po o le CHOGM. O le fonotaga tele lava lea e faatino e auai uma lava ia Taitai o atunuu o le Malo o le Taupulega o lea ou te vaai atu e i ai seleni ia sa faaagaga, aua o fonotaga ia sa fuafua e fai mai iinei i Samoa i le tatou atunuu. E faapea foi le fono lea a le ACPEU. Ia e faapea foi la i le sainiga o le agreement lea sa fuafua e sainia i Samoa nei e le EUACP Samoa Agreement, ia o le fesili la lau afioga i le Taitaifono po o le Minisita foi, i fonotaga ia, po o faataunuu lava, pe faataunuu i le afifio mai o sui usufono, pe faataunuu i luga o le Zoom?

E pei o le fesili lea, aua afai e malaga mai ia le auusufono, o fono ia o lea ou te malamalama i ai, e le i lalo ifo o le 600. O isi lava fonotaga faapea e au i le 1000 ia le auusufono. Ae afai la o lea e fai i luga o le Zoom, ia atonu la e le popole tele ia sou taofi, ae e pei e mafua ona ou tautala i le vaega lea, ona o le faaleleia o tatou faletalimalo ma tapena. Pe a faapea e malaga mai ia le auusufono i Samoa nei. Pe o nisi o le auusufono, e tatau ona lava seleni, e tapena lelei ia tatou faletalimalo, o taavale, ia ae faapea foi la ia tulaga o le tatou soifua maloloina, ina ia mataitu lelei, ina ia aua ne i oo mai ia ni faamai i ai latou e omai.

FOFOGA FETALAI: Faamaea mai lau saunoaga ua maea lou taimi.

Tofa Hon LAUOFO FONOTOE NUA FESILI PIERRE LAUOFO: Ia ona faai ai lea o se faamatalaga lau afioga i le Fofoga Fetalai, o le tuueseeseina o le Faamasinoga ma le tatou... mai i i i le tulaga foi lea o le

Separation Judiciary. O lea ua ou vaai atu ua leai se tupe e tuu i ai mo le faamoemoe lea. Po o le tulaga ua i ai po ua taofia e le faataunuuina? Pe o le a le sao o lea vaega?

O lea sa i ai le seleni e faamoemoe e tuueseese ai le.. masalo o le tulaga tau tupe, masalo ai o le budget lea sa i ai le faamoemoe e tuuese... faapea foi i i le Ofisa o le Fono le afioga i le Fofoga Fetalai, e tuuese foi e tumaoti i tulaga o le faaaogaina o le seleni. O lea foi la o... o i la i le Ofisa o le Fono, ia o lea ou te vaai atu o lea e i ai le seleni o lea e pei e foliga e faaauau le polokalame lea. A o le polokalame i o i le Faamasinoga, o lea ua ou vaai atu ua leai se seleni. O lona uiga pe o le mea ai ua taofia ia lea tulaga.

Ia faafetai i lau afioga i le Fofoga Fetalai, ona o lea ou te vaai atu, ua leai foi se tupe e faatino ai ia le Anti-corruption Authority lea na aumai i i le Ofisa o Suetusi Sili. O lea e taua e galulue ai ia Forensic Auditors ia e toa 10 lea faapea ua uma ona fai ia latou aoaoga faapitoa i Amerika o lea ua omai i inei. Ia o lea la e galulue ai. A fai la o i ai se faamoemoe o le Kapeneta, o i ai ni vaega o le a agai i ai suesuega, ma galulue ai latou nei o Forensic Auditors nei, ia o le faamoemoe lena o lea ou te vaai atu ua leai se seleni, ae o le taua foi o lea vaega pe a faapea o le finagalo lea o le Malo e i ai nai investigation foi ia e tatau ona fai. E pei e lisi mai ai mo mea foi ia e o e suesue lea mea suesue lea mea.

Atonu ai ua uma ona silasila i ai le Kapeneta.

FOFOGA FETALAI: Malo, faafetai ua maea lou taimi.

Tofa Hon LAUOFO FONOTOE NUAFESILI PIERRE LAUOFO: Ia ae tuu atu ai ma le taavale a Olo e suesue ai, ona ou te manao ia kilia lou uso aua ou te talitonu e leai se mea o faaletonu. Malo faafetai i vaega uma ia.

Constitutional Review lau afioga ua uma, Constitutional Review, e tatau...

FOFOGA FETALAI: Malie le sui usufono ua maea lou taimi.

Tofa Hon LAUOFO FONOTOE NUAFESILI PIERRE LAUOFO: Afai e i ai ni suiga tetele o le a tulai mai i le review lea e faagasolo nei, e tatau ona fai se Referendum, ave i le atunuu, ave i le atunuu e aumai se finagalo o le atunuu. Pe afai o le a i ai ni suiga tetele o le a tulai mai Constitutional Review o lo o faagasolo nei i le taimi nei.

Ia lau afioga i le Fofoga Fetalai, ia e faapena se matou tala...

FOFOGA FETALAI: Ia, ua e silasila atu ua faasasao le vae o le uati e tusa ai ma tatou Tulafono...

Tofa Hon LAUOFO FONOTOE NUAFESILI PIERRE LAUOFO: Ia alofagia e le Atua lau Afioga, ia maua lou soifua laulelei, ioe. Ia maua lau tofa, maua le tofa paia, faamanuia le Atua i lau Afioga.

FOFOGA FETALAI: E ese le alofa o le Nofoa ia oe. Malo faafetai.

Tofa Hon LAUOFO FONOTOE NUAFESILI PIERRE LAUOFO: Faafetai lava i lau Afioga. Ioe, ia o lea ua faaiu atu le tulaga e i ai. Ia, Olo, o le a tele tupe o le a i ou aao, aua o lea o le a toe foi atu le licensing o taavaleafi i le LTA, ia ona pule ai lava lea o lau Afioga i tulaga uma faapena i le fuafuaina o isi a tatou auala fou, ma isi uma vaega uma, pe toe faatau ai foi ma se isi taavale e faalua ai au taavale, ma o le a tele ai lava. O lea o le a asiasi uma i ai ma agai uma i ai...

Tofa Hon Olo Fiti Afoa Vaai: Lau Afioga i le Fofoga Fetalai, aua e te popole, o lea o le a oka uma lava land cruiser a le Kapeneta.

Tofa Hon LAUOFO FONOTOE NUAFESILI PIERRE LAUOFO: Faamanuia le Atua i lau Afioga i le Sui Palemia ma le Kapeneta ma lena Itu, ia alofagia foi e le Atua lenei itu o le Maota, ae ou ola. Ia manuia le Fono, manuia foi le weekend.

FOFOGA FETALAI: Malo saunoa i lau Afioga i le Sui Taitai. Ia a lailoa lava lau Afioga e tau tolaulau mea uma, ua uma ona faamaumau uma e le Kapeneta ia mea uma, ae malo foi le faamanatu, o lea ua uma lelei le tatou taimi o e saunoa. Malo faafetai.

Ia, sa i ai le fuafuaga i lau Afioga i le Taitaifono, ua i ai le manatu, ia talosia ia le Aso Gafua, o le a e amatamea i le tatou fonotaga i le Aso Gafua ona faasolo ai loa lea o le tatou Malo e tusa ai o fuafuaga sa fuafua mo lenei aso.

O le mea lea, se i tulai mai lau Afioga i le Sui Palemia.

Afioga Hon TUALA TEVAGA IOSEFO PONIFASIO (Sui Palemia): Lau Afioga i le Fofoga Fetalai, ou te tulai atu ma le ava tele se i fai sina faafetai aua le mamalu lea, aemaise foi o le afio o lau Afioga.

Lau Afioga i le Fofoga Fetalai, o lea ua matau atu ua tau faamaea nisi o vaega, le isi laasaga taua o le tatou Fonousu a samoa i lenei taeao talu mai le amataga o le vaiaso na tea nei. Lau Afioga, ua tuuafu lava le tanoa, ua saausi foi saunoaga aemaise foi o tuleiga i le loloto ma le matagofie, o le oa lea o le faaaliga o finagalo lea sa ou talanoa atu ai i le amataga o le vaiaso, lea ua taoto i le Maota nei, o le Maota e teu ai upu a Samoa. Ia, o le a foi le sousou o lagona ma finagalo foi sa faaaliga, e i ai le talitonuga o lea ua taoto i pagamalie i le alofa ma le agalelei o le Atua.

Lau Afioga i le Fofoga Fetalai, ia o se faafetai faapitoa i lau Afioga aua foi le faatautaiga o le Fonousu a Samoa, e le faigofie le Nofoa o lo o e nofo ai. Ae i ai le talitonuga o lou faatuatua i le Atua ua maua ai lau tofa ma faapena ona e faatonutonu le tulaga foi o le Fono a Samoa, aua o Samoa lea ua atoa i i. O se taimi lau Afioga i le Fofoga Fetalai tatala le filialii, ia talalua Tuna ma Fata aua se soifua manuia o lau Afioga i le Fofoga Fetalai. Ia mamao ni timuto aua le la Itu o le Maota, ia mamao foi le fuelafo aua le afifio atu o Minisita ma lea Itu o le Maota. Ia maua pea e i tatou le filemu mai le Alii. Ia faamanuia foi le Atua i sui usufono uma o le Palemene, aemaise foi o outou aiga ma outou itumalo o lo o tapuai mai.

Faafetai lau Afioga i le Fofoga Fetalai mo lou avanoa. Manuia le Fonousu.

FOFOGA FETALAI: Malo faafetai saunoa i lau Afioga i le Sui Palemia, ua faalaeiau foi ma ave le agaga o le faafetai i le paia o le Maota aua le fitaituga o le tatou galuega mo lenei vaiaso. Malo saunoa, faafetai foi faalaeiau, malo foi faalototele i le tatou Maota. Ia tatou talasoifua ia i le Aso Gafua mo le faaauauina o tatou galuega. Ae ua faamalo le onosai. E matau atu lava ma le agaga fiafia a tatou taualumaga i lenei vaiaso seia oo mai lava i lenei taeao, malo lava. Faamalo saunoa faafetai tapena.

Afai foi ua i ai se faaletonu o le Fofoga Fetalai i le faatautaiga o le tatou galuega, ia e faamalulu atu i le paia o le Palemene. Faafetai Samoa i lau tapuaiga ua ae manuia faiva o lau Palemene i lenei vaiaso ona o lau tatalo. Alofa ma faamagalalo se gagana ua sala a lau Palemene. O le tatalo, tau ina ia alofagia e le Atua le alo atu o le tatou atunuu mo le faaiuga o le vaiaso aemaise o lona Sapati Paia.

Faamalo faafetai lagolago i Ofisa Sili o Pulega o Matagaluega ma Faalapotopotoga Tumaoti a le tatou Malo, malo le onosai. E momoli foi le faafetai i auaunaga uma o lo o tautuaina le tatou Palemene. Faamalo faafetai mo le tautua faaauau.

Ae tatou te le i tolopo, ia o lea ua tapena le taumafataga o le aoauli e taualuga ai foi galuega o lenei vaiaso. Ae tatou te le i tolopo, ou te talosaga atu i lau Afioga i le Minisita o Faamasinoga ma Pulega tau Faamasinoga se i saunia se tatou tatalo e faaii ai le tatou fonotaga.

Na tolopo Taualumaga a le Fono Aoao Faitulafono i le itula e 12:10 i le aoauli seia aulia le Aso Gafua, 27 o Iuni 2022 i le itula e 9:30 i le taeao.